


那

請觀音經疏闡義

C40
4514
211



C40-45-14

三第座請天職及下
家書置之武州紫雲山
我微榮落虎窟府中未
為學者不敢許出院內
當山二世鐵十機謹誌



B 64853

請觀音經疏



隋天
台智者大師說
弟子頂法師記

此經從人法以標名人是至慈之大士法是至良之
神咒人有二義一通二別別是觀音之勝名通是菩
薩之嘉號別又二義一能二所請字是標能感之群
機觀世音三字是標能應之聖主法有二義一用二
體消伏毒害明其力用陀羅尼明其正體體有二義
此間名為能持能遮持於三義遮於二邊用即為三
一事二行三理事者虎狼刀劍等也行者五住煩惱

經

請觀音經疏

法

也理者法界無闕無染而染卽理性之毒也故言從人法以標名焉經前玄義五重云云名者從人法以爲名靈知寂照法身爲體感應爲宗救危拔苦爲用大乘爲教相名者衆經皆有通名別名此經人法等是別名經之一字是通名所以有此通別者三義往簡一教二行三理教者聲聞不同諸部名異異故是別狀同是佛口所說非餘弟子人天所作是名通約行者入道多途非唯一種觀門有異修習亦殊是故言別契道之時同歸一理是故論通理者理是一法多諸名字或云真如實際實相阿黎耶識種種名字名

字旣異所以稱別同名一理是故論通今就別名復爲二一人二法人法相成豈得相離今欲令易解故作兩釋先明於人次明於法人者卽爲二一能請之人二所請之人請之一字是標能請之人卽是有機之徒感於菩薩觀世音三字標所請之人今明能請有三義一爲自故請二爲他故請三護正法故請並出下文如斯那等是自請如月蓋是爲他請七言偈是護正法請復次自請是攝善法戒爲他是攝衆生戒護法是攝正法戒若得意只三請還是一法何以故如欲使自身戒定慧明淨卽是攝善法若已定慧

淨能利益他卽是攝眾生界是故華嚴云心佛及眾生是三無差別故知三法是一也今作三者隨行者意逐其傍正或時自行爲正餘二傍云云自請復爲三一延請二祈請三願請爲他護法皆具延祈願三請也此之三請只是機感之因用延祈願三請卽對三業延卽屈伸俯仰延致之義卽身業請祈卽發口干求卽口業請願卽要心處所卽意業請皆出下文如五體投地是身業四行偈明大悲覆一切是口業一心一意是意業復次延卽是請人祈是請法願是總人法今就延請又爲三一標心請一約行請三約證

請標心者如域意祈求專誠致請機成則感大聖也行請者如人雖不標心但其三業無瑕身口純淨大士自朕感應證請者如其修念佛三昧現前時十方諸佛悉皆現前身業既具此三請口意亦爾合有九請自既有九爲他三業亦有九護法三業亦有九三九二十七足前十二合有三十九請能請既有三十九能所合辯卽有七十八種也能請之人卽是十法界衆生十界之中九界論請佛界須料簡第三明所請之人卽是觀世音也此又爲二一通二別別卽觀世音三字通卽菩薩兩字亦約此通別明二義教行

理教者菩薩皆具衆德普修萬行爲逗物設教各立
一名如文殊以妙德爲稱彌勒以慈心爲名此菩薩
以觀智標號至論三德妙理亦不異無緣之慈一切
種智但逗物宜聞各舉一名耳各舉故論別從初地
至後等覺同是因地故稱通約行者萬行皆修趣舉
一行爲首如五百比丘各說身因亦如三十二菩薩
各說入不二法門是故論別同入無生至理此處不
殊故言通約理者無相一理多諸名字名字各異所
以亦異是故言別異名異說不離於理是故言通今
釋別名得觀世音稱者卽爲二一總釋二別釋總釋

又二一破二立破者觀是能觀之智世是所觀之境
從境智得名今問此境智爲當自境故境自智故智
爲當是由境故智由智故境爲當是境智合故境境
智合故智爲當非境非智故智非境非智故境若自
境自智此是自生等此之四執皆如中論所破墮在
自他四句中復次有此四見故具有六十二見見故
是受受有三受三受故有三苦樂受則愛苦受則恚
不苦不樂則癡三毒等有各等分從此四分開出八
萬四千塵勞卽是集諦以集故能招感生死苦報不
窮卽苦諦自生見中具六十二見四分煩惱八萬塵

勞苦集流轉餘三見亦爾故經言衆生處處著卽四見所起苦集也今時人尚不識自中所起苦集何能被他生共無因等諸見苦集以其不識四句中苦集故無道無道故無滅故令生死浩然是故不用第二立者今所明境智非自非他共無因等畢竟空寂言語道斷心行處滅何境何智之可論有所依則有所著若無四執則無所依倚無所依倚則無受無受則無集無集則無苦問若如是者亦無道滅答如此破四執之見故知句句中九十人使各識病名苦集於四見無滯闕各識道知四見皆是汙穢五陰是見依

色不淨不受名爲念處勤斷見增道名四正勤道品等又正勤心覺了四執卽佛寶了達法性卽法寶與實相和合卽僧寶如此觀時四諦三寶宛狀假名以無所住心四悉檀意赴物機宜假設方便而論境智則有四種一因緣境智二假名境智三四悉檀境智四不思議境智因緣者或從自生他共無因等四種因緣而明境智故經言一切法從緣生也二假名者若實者則不可立以其浮虛不實假名施設如破瓶斲首等但有名字故云是字不住亦不住無所有故故名假名境智也赴緣四悉檀者法眼明了深識

機宜逐其樂欲便宜對治第一義而為立名則以出假名道種智中所明境智不思議境智者法界之理雖無境智之二而論境智故經言不思議智境不思議智照境智不二不相妨闕此之四種欲擬四教所明境智也今觀世音久祛四執慈悲普被應物立名而辯四種之號也故經言我於三乘亦無志求欲求聲聞云云第二別釋者又為二一明境二明智今言境者即是三諦三境一因緣俗諦境二真諦境三中道第一義諦境此之三境為智所觀即為四一者觀因緣觀觀俗諦麤事二者觀因緣俗諦麤細空無所有

無非幻化即是入空觀三者分別俗諦萬物方圓長短四微好醜細事無滯即是出假觀四者觀真俗之實相是中道第一義諦觀故涅槃云十二因緣有四種觀中論偈云因緣所生法即空即假即中之謂也但此之四觀終是三諦之境問俗諦何獨開為二觀耶答俗境有麤細故開為二又問俗有麤細為二觀真亦淺深亦應二觀答俗是事故得為二真是理則無二是故不開約此四觀亦明自觀化他護法標心行證等觀云云次明智者又為二初明智義二通對諸法今明智義者觀因緣俗是世智亦名名字智亦

明等智觀因緣空觀亦名二諦觀亦名一切智出假
觀亦名平等觀亦名道種智中道觀者亦名一切種
智世智是世間之智但有名字凡聖通用但此智不
能出生死菩薩觀因緣時於此觀中具行六度慈悲
喜捨來成勝解具一切法然後坐道場三十四心斷
煩惱如旃延子所明菩薩義卽是三藏境智觀音若
觀因緣空不同二乘取證有善方便雖行於空不住
於空而修萬行慈悲喜捨成滿誓願從初心斷結乃
至十地爲如佛卽通教境智觀音也若觀假名不同
通教但從空出此中明知空非空破空出假以四悉

檀具修萬行斷除塵沙無知之惑登初地斷無明乃
至十地行滿卽是別教境智觀音也圓教中道者不
同別教次第觀理斷無明此乃稱理之觀理旣三諦
之境觀亦三智之觀從初至後三諦圓觀初住已能
五住圓除乃至四十二地無明究竟稱爲妙覺觀音
約此法門圓觀三諦故稱圓教境智觀音也第二通
對諸法者此之三智亦對五眼照俗諦麤報色名肉
眼照俗諦細報色名天眼照真名慧眼照假中諸道
根性有別一切藥病塵沙法門名法眼照真俗之實
相名佛眼此眼觀三法是一而異名開合四觀五眼

三智云此之三智今合四教因緣法是三藏教卽空是通教出假是別教中道是圓教如是廣類通諸經論異名法相皆融會入三智之法無不收攝云世者卽是十法界差別隔異故言世世是色色卽觀世身四心是意卽觀世意音是機卽觀世音一界之中有自他護法自中有延祈願延中有標心行證等一界有三十九十界有三百九十觀也次釋通名言菩薩者具名菩提薩埵摩訶薩埵菩提名道薩埵名成衆生摩訶言大釋論云菩薩初發心誓度於一切能忍成道事不動亦不破是心名薩埵以菩提是成就衆

生道有種種成因緣道空道第一義道道語則通通稱爲菩薩也又於諸道中又言通別若直修因緣道止是人天乘此道則通若能起慈悲誓願萬行莊嚴是菩薩道此道則別今菩薩徧觀諸道徧行諸行無不周普豈有捨一取一經言五眼具足成菩提然菩薩於諸道亦不作難心苦心亦不分別我行是道不得是道分別出自前人之情希向旣殊修行爲機亦異感降不同若作三藏教學者自感三藏之觀音乃至一心具萬行學者自見圓教觀音故經言隨諸衆生類爲之立異字也他人問三業俱觀身口若爲觀

答聖觀智觀前人身口非是身口觀前人也意謂通亦得第二釋法卽消伏毒害陀羅尼也消伏者消名消除伏名調伏故經言消除三障無諸惡五眼具足成菩提但除其病不除其法譬如蛇虺有毒但除消其螫蠱令不侵人不可殞命也伏者調善令堪乘馭伏三障之毒爲入道之門隨應得度而度脫之故不須斷復次消有二義一消除二消滅卽對斷煩惱入涅槃不斷入涅槃也伏亦二義一除伏二平伏亦對斷不斷也如金剛般若云如是降伏其心降是消義具二種消伏是二種伏也毒卽三障文有三番明咒

初云淨三毒根卽煩惱障次云破惡業卽業障次云遊戲五道及八難苦卽報障通論三障其相如是但別明不無輕重之殊卽用三咒消伏其病也歷四教十法界除三障陀羅尼者如釋論云陀羅尼中無闍陀羅尼最大三昧中王三昧最大此翻言能持能遮持者持名持義行證化他正法等遮者遮三障遮三障名消持名義爲伏咒卽是願也經者教也如舊釋此對四詮教云云餘四重玄義出餘感應爲宗者以十法界衆生三業爲機備於四句云云分文爲三從如是至令得無患是序分第二從爾時佛告長者至如除

重雲生諸佛前名正說分第三從佛說是已去訖文
名流通分或時正說訖後番咒令不橫死爲正說分
今依前生起三段如別文今就序爲二次序由序述
叙居一說之初名次序神光駭集名由序言論激發
名述叙引例云三序之中復有通有別諸經同有次
序故名通由藉各異故言別如是者如舊解大林者
是第一義包含二諦故名大萬德叢聚故名林精者
無八倒故名精如涅槃觀色不淨因滅是色獲得常
色一陰通除八倒五陰合除四十倒名精空於二邊
畢竟空故名舍亦是住十八空理故名舍重閣者重

空觀也空生死涅槃也

云云

就第一列聲聞有五

云云如

鍊真金是總歎

云云

澄卽歎定靜卽歎慧具足身心諸

定也色界四禪爲身定無色四空爲心定前三背捨
是身定後五背捨是心定故知得解脫者身心澄靜

也

云云

第二列菩薩衆大智去有六句前四是約因

歎後二是鄰果歎大智者是慧莊嚴名爲解亦名爲

目調伏諸根名福莊嚴名爲行亦名爲足目足備故

入清涼池若約四種明智者三藏以四諦智爲大智

通教以空慧爲大智別教以道種智爲大智亦可二

諦智爲別大智圓教以一切種智爲大智一切種智

亦有一切智此是總別之異名例如四諦十六諦四
六不同二乘義一切智云云本行者若修行爲語從行
以入理則爲本若化道者從本起行如般若中百
二十條勸學欲得佛法皆學般若般若卽是諸行故
知般若若行本如如意珠出生衆寶若無此慧解則
不能起行要因有解立行故智爲行本皆成者還約
四種論成非但解成亦是行滿具足云云調伏者是明
福德故大經云福德莊嚴者所謂六波羅蜜智慧莊
嚴者所謂從一地乃至十地智慧今依諸度以釋調
伏諸根義也如金剛般若明檀義初約眼根辦法相

謂不住色布施若住色此名眼慳捨色名檀檀義攝
三資生無畏法故約檀明義餘度自顯又經云福德
莊嚴者有爲有漏此卽斥無方便者亦是福德不趣
菩提因實相慧導此福德以成正覺以有慧故眼色
三事皆空若是但空復成聲聞無方便空菩薩以不
可得空是空亦空無染不著而能於眼空中慈悲方
便行諸萬行通達佛道導成福德趣於菩提但眼之
本不空不有卽是正因佛性了此眼不可得空卽是
了因佛性能捨一切塵勞而行布施事中諸用功德
卽緣因佛性約此眼根明三般若三解脫三法身在

眼中亦約四位調伏諸根義於色中不起惡不染即
 因緣中不著色眼中檀義若知色空如幻即通教中
 調伏眼捨二十五有檀義知色假名分別一切色諸
 法相而不為諸惑所惑即別教調伏眼即出假捨無
 知障明檀義若知色非色不二本性常淨即中道調
 伏乃至諸根調伏云云如思益云不為六塵所傷名尸
 能忍違從之境名忍於因緣六塵不染名生忍於空
 中不著違從名法忍出假名中不著違從名法忍圓
 教中違從不著名中道忍捨六塵不染六根名精念
 念入道名進亦於四位中明不雜辨精進云云離憂喜

苦樂諸根故名禪初禪離憂根得覺支二禪離苦根
 得喜支三禪除喜得樂支四禪除樂得不苦不樂得
 捨支是名眼根中得禪若如大乘菩薩眼根入正受
 耳根三昧起即是於六根具禪般若者根塵識三事
 是不可得了達究竟盡即般若如是於眼中方便修
 六度具佛威儀者即八相成佛道之威儀論四位中
 智慧覺了得八相義而非具但名鄰果等覺方是具
 也心大如海如論四位所約各有大義而非究竟今
 中道正觀具三義廣深含眾流乃名大海今正智照
 十法界相名廣徹真源故名深攝萬法故名受流正

觀乃名大也列名皆的中道觀判名也實卽實相
實智也月卽虧盈半滿方便權智也云云月光約智斷
二德也跋陀云賢首等覺是衆賢位極故佛聖首聖
極故云云第三列凡夫衆卽有八部名四種衆當機是
五百及後得道者發起是月蓋舍利弗等影響是上
列二萬及八部中權者結緣者是當時無益後世得
度人也又作乘急戒緩四句云云第二由序者從毗舍
離去是由藉序就此爲二一病相二明病由文中說
因之與病乃是假事表理豈可止就事解而不深推
卽具兩釋就事舍離翻爲廣嚴具如淨名疏中釋明

諸病者及病相不出此國也病相卽是眼赤如血耳
膿等是也此病相是五根之相眼主肝耳主腎鼻主
肺舌主脾口主心化爲麤澀是身根病相如人食惡
食納腹內爲病卽是主身根以五根病故意識昏迷
故云如醉卽是意根病良由五根不利致五根病惱
亦可病從五根入五臟傷壞病由者卽是五夜又
惡鬼爲是鬼故致令國人疾惱故言病之所由就理
釋者法界之國無邊名廣性善莊飾是嚴義十種行
人不出法界十者分段有八一受苦報人二修世間
善法三修聲聞四修緣覺五修六度六修通教七修

別教八修圓教此八在分段未斷惑造心之始各修諸法而有愛見之惑致六塵傷壞六根而致病也變易土二人卽是分段盡來入別位三十心中或入圓位初住中此二人地地之中皆有愛見若別教有淨妙五欲之愛四句見佛性不融之見圓教有佛愛菩提愛順道愛四門見佛性等見皆是愛見義由是見故於五根中謂色是常是無常等四執謂是事實餘妄語而作四執之解推理之心皆是病義於五根推理名爲夜又生五見故名爲眼鉤牙惡業從下向上傷害於人吸人福德智慧精氣以是惡業故言面黑

如墨第三叙述序者從城中有長者去爲三一敬儀二叙病三請如文耆婆是世醫妙術不救者就世間妙術爲四一因緣事中明妙術卽醫方神仙禁咒等術二空見外道無因果謂此爲是爲術也亦有亦無非有非無外之妙術此四種妙術世醫所不能救治愛見之病故令五眼不明五分之身羸損福慧之精消歇五見愛夜又所蠱害故請觀音云云第二從爾時佛告長者名爲正說三序旣足弄引義成是故正須利益故言正說就此爲五一示能除毒害人方所二勸長者三業祈請三因光見佛三聖降臨四具

椽枝淨水五說咒治病有生起意云就初示方所爲
二一示方所二列名歎德言不遠者西方去此二十
恒河沙何故言不遠一解云於凡是遠於聖不遠今
解不爾若機緣未熟雖近而遠若機緣熟雖遠而必
應故言不遠西方者佛法之中乃非時方數陰持入
所不攝但隨俗故亦有時方使人信受言西者若依
五行西卽是金金王決斷剛直之義若對四諦卽道
諦道是能通用智慧見理此言彼有大智觀音能以
無闍陀羅尼消此之毒故西方用表道諦也又解云
日從東出而入於西此明東土釋迦能發生物善西

方之佛能斷除衆生之惑生滅兩機在此二土故言
西方也無量壽者佛有二種無量一生身無量此則
有量之無量也二法身無量此是無量之無量也今
釋迦彌陀俱是法身之無量此化緣短故故生身是
有量彼佛化道長非人天所知故生身是無量而實
有數也耆闍黎師解云釋迦爲應彼佛爲真執應不
能除毒害見真則能消伏毒害今不用此解但此土
西土同是應佛淨穢相形故有優劣若作真語不復
得移動辨其優劣若彼是真佛土應極淨此則不可
若作本迹語此爲迹彼爲本本迹相傳望此語則寬

雖狀今亦不用那知釋迦是迹無量是本二佛各有
本迹那互爲本迹此又不可今明此土爲穢彼卽爲
淨今穢國衆生見思毒害欲借淨土來破其病是故
請於彼佛國土相形互爲優劣破惑互有消除如十
種行人作意祈請方法不同是故觀音十種垂應有
異此亦十種西方十種祈請十種消伏毒害也問何
意請彼佛耶答此土請釋迦爲消伏之因彼佛二菩
薩爲外緣因緣應在二佛故勸令請又就彼佛表如
來法身實相之境觀音表中道正觀之智大勢表福
德神力熏修但聖人皆具三德無不具足今各據一

門的當爲語三人各從一法標名今欲消伏毒害必
須勝境顯發法身亦須智慧照了除惑亦須福德資
成智慧是故三聖俱請問若三聖俱請何意獨標題
稱請觀音答正言智慧是除毒之對治對治義強總
略爲言故止標一人得意具三義也恒以大悲者是
歎也三聖俱有大悲俱憫俱救然而別說如來以大
悲爲法身之境觀音爲智照大勢爲福力冥熏然而
皆具悲憫救濟也第二從汝當五體投地去勸示祈
請申三業之機大聖乃當常欲濟拔爲外緣無創之
者毒不得入應須內因故令運三業爲機也事解五

體投地者衆生之本體一義同父母是故虔恭尊敬
歸投於地表欲報恩之相理解地是一實相若與薩
婆若相應心合故名爲投地若離薩婆若名不投地
如人謙卑恭謹是則投地致禮與常理合若傲慢逆
理禮則不施今明五體卽表五陰左脚是色右脚是
受左手是行右手是想頭是識何故爾受是心神之
法爲陽如右脚戒是色法無作冥密如陰表左脚故
言左陰右陽也想了是推晝前境是陽如右手行是思
數如陰表左手頭爲識者五識在頭能了別故對頭
若離薩婆若而起五陰者此是平倚五體不歸命觀

音毒害不消名爲惑是故沉淪生死爲五受陰所害
若依薩婆若心地者卽得五分法身之五陰戒是防
護七支故是色陰定是受者如經說三昧是正受定
意開出故定是受陰慧是悟虛智卽想陰解脫卽是
行陰行陰招累故解脫無累對之解脫知見卽是識
陰識陰能了別故以五分法身代生死之五陰故涅
槃云因滅是色獲得常色乃至受想行識亦復如是
卽是薩婆若心故名五體投地五體歸命能令毒害
消伏名之爲解脫則出生死蕭狀累表故言五體投
地也燒香散華者香卽熏馨遮掩臭穢表於智慧斷

結毒害香卽智慧也亦是止善散華表定定是福德
莊嚴如華能嚴飾彫麗故用華以表定亦名行善復
次華以表慧何以故華是可見法慧是照了見理之
法用華以對慧香以對定者香是冥熏對定有寂靜
之義故用對定何故作此互判此是通釋定中有慧
慧中有定若別對者法身皆名爲慧此中豈得無定
七淨之法皆名爲華此中豈得無慧而別對定慧也
故言化訓滅五陰拔斷十二根復次燒香對無作善
無作因作而發不須更作任運常起亦如人受戒作
意發得無作任運常能破惡如燒香時止用火爲緣

卽便煙香任運徧滿故用香對無作善華以手散若
不運手華則不散此對作善若不作善則不生旣表
無作作兩善定慧亦爾明此約十種行人故用對此
云云合消伏毒害意繫念是勸意業所以先意後口者
先須域意然後口宣言繫念卽是默念之請作禮卽
是延請口請佛卽是祈請也繫念之法若能調和不
風不喘不氣者名之爲息十息爲一念凡百息爲十
念能如是者下根人卽得心定亂止中根人得細住
上根人卽得未到地定於未到定喜發諸禪及諸無
漏或於此定見十方佛念佛三昧乃至一切禪多約

未到定發得也卽將此數息約十種行人若數息調
適能令身心安靜四大調和卽是消伏果報上毒害
若數數時能令善心開發惡心調伏煩惱惡業俱息
其世者卽是人天數息若觀此所數數息是風氣四
大之强者故言此身無住風力所能風氣卽是法色
也能觀之心王卽是識領受此數卽是受緣想此數
卽是想其餘諸數卽是行數息中具五陰卽是四念
處觀名聲聞數息若觀息是過去無明因緣所成致
現在果報息三世因緣卽是緣覺人數息若觀息不
保不愛無所著名檀不於數息起不善名尸能安忍

耐此數息名忍念念相續名精進知色數法在緣不
謬亂名定照了數法分明分別是風是喘識邪正是
智慧無相等慧卽通教數息別修數息不定空不定
俗中道佛性前後觀之卽別教數息若圓觀此息非
空非假一心三諦圓說卽圓教數息也第二因光見
佛爲二一見佛二三聖降臨今言於光中者卽是釋
迦放法身之光如如智慧之光照了因此法身得見
應身也如來神力者或可是釋迦力或可如來只是
真如之法此真如有神力乘此神力而來故言神力
不動舍離至實相之法界廣嚴之處住此地憫衆生

爲除毒害城卽法界取其防非禦敵之用爲城門卽不二門住此門不動令衆生得入此門到法性城也金色照者如如卽智還照如如境第四卽具楊枝淨水者此是勸具兩因正爲機感也楊枝拂動以表慧淨水澄滄以表定楊枝又二義一拂除卽對上消義二拂打卽對上伏義又拂除對消滅之消二拂打卽對消除淨水二義一消除卽對消義二惺悟卽對伏消滅之消潤漬對消除之消惺悟對除伏之伏安樂對平伏之伏復次洗除對消伏毒害大悲拔苦是慧

義潤漬是大慈與樂是定義惺悟是慧義安樂是定義明此約十種行人自各有定慧拔苦與樂各有消滅伏義例作云舊約此經文爲懺悔方法制爲十意常所行用八意出在經文一一檢取一莊嚴道場二作禮三燒香散華四繫念五具楊枝六請三寶七誦咒八披陳九禮拜十坐禪釋此十意備作事理云第五從大悲觀世音而說咒曰去爲三初從此去訖平復如本明消伏毒害是破煩惱障第二從世尊重請觀音去至如鷹隼飛明破惡業障第三從繫在囹圄去訖現前見佛說六字章句已去破六道治六根俱

是破報障通論三障皆是毒害皆是煩惱皆是惡業
皆是報法若別論不無輕重分爲三障三處經文悉
具三障之語今就別明義判三咒破三障此有兩義
或有人三障而悉須三咒破之自有人雖具三障而
煩惱最重若破煩惱餘障弱者自消或業重或報重
是故隨其强者破之弱者隨去或有人雖破煩惱業
報猶在如羅漢雖破子縛而猶有償狗鬻除者例爾
或除一障餘者皆除如經言若斷一法我證汝得阿
那含果所謂貪也非是斷一能得此果乃是斷其重
者輕自隨滅復次三咒治三障對三根人初咒對上

根十種人煩惱毒害次咒破中根十種人惡業毒害
後咒破下根十種人果報毒害也毒害之名通此三
根能害法身慧命故今從別義更立破煩惱破惡業
破報之名就理無勝劣行人修進便宜而爲勝劣類
如法華三周說法通名開三顯一初說當開權顯實
之名第二第三亦復如是而論別更加法譬因緣卽
此三番咒通別之意也自有人取後一番咒爲正說
卽是兼於總別而治三障也若不取後咒爲正說者
只於前三咒之中各作正旁卽兼得總別意也今就
初咒爲五一勸三業爲機二歎咒體用三正說咒四

明行者得益五舍離人平復就勸機爲二一經家叙
二正三業致請三稱三寶是通爲衆生作消伏之所
觀音是別緣是故請三寶復有通別所以三稱或可
欲除三障故或可表三周說咒故或可表三釋故須
三稱也三業如文云四行偈爲二初二行正請後二
行結請初爲二前一行總請後一行別請初一句標
自請次三句自他請苦厄者約十種行人皆云苦厄
云云不獨苦在身上眼赤耳膿之厄也大悲覆一切者
非止覆舍離城中之苦亦是覆十法界人故言一切
也普放光者卽是請大智光明爲調伏柔善滅除無

明癡闇卽消除如華嚴又放光或除慳除恚等種種
所治今此智光亦治十種行人之毒害也無明旣盡
如覆大地卽頓除惑次第除十人惑卽漸除惑也次
別請卽是別標三障殺害苦者卽是毒害惡業也由
毒害故所以招苦報是故言害歷十種行人中明惡
業毒害也如魔喜來惱行者或將空來破其有中修
行令墮二乘害其菩提之善或將散善布施來破其
空無相無漏善令墮人天中皆是害義二障如文必
來是欲降施大樂者請大慈大慈調伏柔善大樂故
前是大悲拔苦是消滅義若世間苦報得除亦名爲

樂人天善成亦名爲樂如是等分有樂義而不名大至得常樂圓教之理方名爲大樂能請語長遠故知不止請於舍離城報苦一種也次二偈語慈父者十種行人皆名衆生世間而有父子義者同有佛性如來藏理是正因性昔經世世相隨或作諸功德低頭舉手隨從化道卽是緣因性但未有了因而今結縛得滅爲說消除毒害平復如本豈非了因性三種天性相關得爲父子故請云世間慈悲父免我三毒苦當知請父甚廣豈止事中報障耶病除爲今世樂未來當得道爲涅槃樂未來有餘涅槃爲今世樂無餘

爲後世樂十種人當分得道爲今世究竟涅槃爲後世餘諸樂非大樂究竟方是大樂也第二稱歎神咒爲二一歎咒體二明用從白佛必定去是歎體卽是實相正觀之體非空非有遮於二邊之惡業持於中道之正善名實相咒體也此體具於三德不縱不橫文云三世諸佛陀羅尼印卽是法身實相之德必定卽是師子吼決定說般若吉祥卽衆苦永得盡普令各解脫以此三德歎陀羅尼體也又必定名師子吼消滅拔苦義吉祥是善利之詞是調伏與樂義故大品云是大神咒大時咒無等等咒只是願佛說法

時願衆生如立是咒也譬如螟蛉故諸經皆是咒也
中道之咒遮於二邊伏空伏有攷於二邊滅空滅有
卽是消滅伏之亦有餘伏平伏等意云云咒亦是願亦
是禁咒咒誓亦是咒術術法盡與十行人毒害相應
密能消伏諸佛祕要不可思議也三世佛印卽是實
相印印定諸經故名咒體也聞此咒者卽是明用如
不識藥未知其良若不明用何知力强苦盡是消滅
得樂是調伏遠八難是消滅得念佛定是調伏調伏
柔善感見諸佛乃至有見無見四見橫計不順於理
皆名惡業二乘空中所見三藏四門通教四門皆未

順理亦是惡業今此中道神咒悉能消伏當知此咒
神用廣遠第四持者得福如文第五平復如本約十
行人明如本此報身無明之病今病除如本本修世
善之心無惡業之害五塵之病今還復人天善本修
四諦求涅槃以無見愛今得前心故言平復乃至圓
教亦爾本是法性淨照起五住妄惑之病卽病除與
法性等故言如本第二從爾時世尊憐憫去是破惡
業咒就此爲三一如來重請二觀音奉命說三佛述
成今言佛請者非是自請是爲他護法耳請字有二
音若作淨語可施於下如天子請百官又經題呼爲

淨可施凡下若作請語重兩語隨意消息今意重說
消伏毒害咒者從通爲言又破惡業咒者從別受稱
如前云云第二正說咒爲二一正說咒三明力用一說
咒言承佛力者承於如如大覺之力也更稱三寶義
同前一切怖畏者卽復爲二一總明咒力用二別釋
今言一切怖畏者一歷十種行人各各有怖畏也二
作惡鬼虎狼者例如金光明初地至十地皆有虎狼
師子之難此中十人乃無事中虎狼約煩惱法爲虎
狼也別釋者從破梵行人去也十惡業者十惡是性
戒受與不受俱是罪不同其餘遮制等戒如比丘草

木戒受者犯得罪不受犯不得罪今取性重者咒力
能令清淨輕者例滅設者有二義一假設設二者但
設設性淨之理本無惡業今起惡業皆是虛假實來
破虛皆使清淨故言設此明除虛妄之假也但設者
但有一法是業種類所攝者無問重輕此咒皆能破
之令清淨大品設有一法過涅槃者亦如幻化此條
然言無如十九界等畢竟不可得今言假設不妨有
浮虛之樂與大品設語乃同復爲異云云現前見佛者
見佛三昧爲種地獄人念佛時感見形質不同乃至
人中所見二乘通別等菩薩所見各異凡約十行人

明見佛不同三昧觀法亦異云云從佛告阿難去是第三佛述成就此爲四一述功能二勸行法方軌三引證四結成功能就明功能中能除二種患難身無患心無病從凡夫地乃至等覺猶一生在皆有身心於分段中具三塗身心人至第四禪爲身病四空有心病故知苦樂隨身至四禪憂喜隨心至有頂若聲聞五方便人具足身心之患須陀洹雖見諦思惟尚在乃至羅漢有餘時身病尚在習氣不忘亦是心病緣覺亦爾六度通教亦爾若斷分段生變易者此就無作四諦中五分法身深淺優劣無明住地心惑重輕

乃至餘一生成在三賢十聖住果報豈非是身乃至欲得佛無上報皆是身患無明未盡佛性不了皆是心病故經云因滅是色獲得常色方無身病因滅受想行識獲得常受想行識方無心病還將此身心兩患約十種行人云云火從四面來此是外火節節疼痛是內火事解如文理解外來者是見惑橫計而生故言外來四面卽是有無四見等此見焚燒見諦解故言燒身龍是神靈之物卽表法王自在設教如龍雨兩除見惑如火滅卽是信行人節節疼痛是思惟惑附理生如須陀洹人已得無漏理解而猶有思惑故言

內火節節卽是思惟所斷九品欲界九品四禪四空等處處九品豈非節節也前一作信行龍王降雨今龍卽是無漏心王發得禪定法水滅思惑火也明此約十種行人分段見思可解變易既有菩薩勝妙五欲此中自有無作界外見思例作火義至一生在云云穀貴饑饉者事解五穀不收爲饑菜蔬不生爲饑譬解者遠聖不聞道爲饑近則爲飽無正慧爲饑無助道爲饑如法華饑餓羸瘦此則事中乃至人天善皆例饑飽義若二乘非饑者法華不應云從饑國來此則小乘爲饑大乘爲飽約十人傳作云云王難者分段

用四魔爲難變易用十魔爲難乃至一生在亦有魔故言三魔已盡唯有一分死魔在惡獸是惡業盜賊是六根六塵迷路是邪僻牢獄是果報果報二種一者約諸道明報獄如人得天往云云二者當分受身爲獄亦約十行人桎械是定慧障枷是權實障鎖是得業繩等也海是生死或云法性妄想動法性故波浪爲難夜叉羅刹是見思毒藥是理境如四見取理不得而成毒故法性亦名毒藥亦名甘露刀劍是無常三界皆爲無常所遷云云第二從此陀羅尼灌頂去是勸如法行經三一正勸二示法用三得益灌頂者事

解云輪王欲授位太子取四海水淋太子頂而委以天下故云灌頂若案十地云佛授十地菩薩記以法性海水淋十地法王子頂名爲佛受職故稱灌頂也今明此義凡有十種人智有頂可見佛但法性無見頂者餘人少分智慧理極不能思度名之爲頂若得陀羅尼咒被灌之卽能得進解行轉深名爲灌頂如是約十種人皆有頂義皆有被灌之義唯妙覺身最高極不可復灌能以陀羅水普灌十種人頂此十地之頂也齋者齊也齊身口業也齊者只是中道也後不得食者表中道法界外更無別法也中前得啖而

非正中此得明表前方便但似道之中得有證義故得啖也亦是表中道法界外有法也不啖肉者是無緣大慈也故不啖衆生緣法緣皆有分齊此無緣無分齊故不得啖也灰者五停心觀也五辛苦癖是五陰苦諦也葷氣是五陰中有集諦也汗穢五陰苦集也十方佛是十法界皆有佛性七佛是七覺分第三從佛告阿難有一女人去是引證非是獨證此段亦通證於前如文云云第四從此咒功德三障永盡是結成功能如文第三從若有衆生罔圖去是第三番咒除報障此卽爲四一明說咒之由二正說咒三稱歎

功用四結成第一所由及第二正說如文第三歎功用文爲三一明六道六字章句用二明修因六字章句用三明六根六字章句用他釋六字者或言稱三寶名是六字章句此配六字乃足而不見文中有標章結句之言或三寶爲三字觀世音爲三字此於誦持爲便上文不標章結句若以此六字者處處皆有此義則通今皆不用今明六字章句者案經文有標章結句起盡之文約義爲便明六字章句今案經對六道六妙六根等以明六字章句如大經對二十五有明二十五三昧今對六道明六字章句成消伏六

道之毒害於義爲便所以明此三種章句此三種六字凡有三處六出初明果報六字章句者說偈竟卽云若有四部聞六字章句去便廣說六道中拔苦功用之事後結句云若有聞此六字章句次明修因六字章句者如斯那聞六字章句觀心心脉者廣明六妙後卽結云此大精進勇猛寶幢六字章句三明六根六字章句者從舍利弗在寒林中斯那問眼眼與色相應云何攝住者廣明六根後卽結云聞此六字章句數息繫念淨行之法此卽三種起盡文義泠然故依此爲判也第一明六道六字章句者六道是果

報法故六道是六字門一道之中分別有無量種卽是章句觀音又照六道實相得陀羅尼究竟旨歸如大經云二十五有有我不耶答云有我我卽佛性諸佛菩薩窮此理性於諸道中而得自在故能以陀羅尼力消除六道三障之毒害今此中偈但列五道名若依舊解五道者但合脩羅爲一鬼道若開卽成六道今文正明脩羅爲一道復明餓鬼道而不辨天道不知是翻者脫落不知更有別意今斟酌者或可天道苦少且明下五道耳故不論六又長行中則有六道義何以故如云從迷失道徑去乃至婦人生難此

是人道此兜巍巍能免地獄餓鬼畜生脩羅等苦卽是四惡道入難者卽長壽天是一難此語卽攝天道故具六道又偈中云普教一切衆令離生死苦若爾者一切之言卽是攝得六道云云今約六道段中爲四一明拔六道苦惱難二明得失三說偈四結如文從今世後世不吉祥事未盡無餘是明失也從持戒精進皆悉具足是明得也又二義一明得念定總持諸法次明得見佛得旋陀羅尼得陀羅尼者勘法華經明位卽齊佛如無生忍此卽似初境界云云第二從王舍城斯那去明修因六字此爲二一通二別通中又

經

音義

三

卷一

爲二一略觀心心脉者若事解只赤肉之心一身之主由是心脉能開出一切脉能開之心一身之主由是心脉能開出一切脉以通成一身具如通明觀云云此卽是因緣釋心義若空共一切世間中無不從心造心如工畫師造種種五陰種種五陰由心故有心無故一切法亦無心不有一切法不有心空故一切法空云云雖一切法空而有諸脉名字假名差別從一心脉乃至無量諸脉皆能通達而無滯闕此卽達心脉是假名故一切法皆是假名云云心脉若定是空空不可假心若定是假假不可作空當知心脉不空不

假當知一切諸脉亦不空不假如是則遮於二邊兼照空假卽是圓觀心脉如是三觀歷十種行人云云今約經文作三觀者若有能觀卽有所觀能所合故卽是因緣觀也使想一處卽是入空觀也見觀世音卽是出假觀也卽得解脫者卽是中道觀也而又云得阿羅漢者此約十種行人小乘大乘明羅漢無咎云云第二從端身去是廣明也依禪法明云云二十五種方便俱有事理兩解今正取調五事明調色息心三方便是此文正方便意原身之始始於三事衆生不知三事故名迷達三事故名解今爲修此六字故須方

便調此三事從端身是調身正心是調心心氣相續是調息端身是約戒正心是約定氣相續是約慧此明戒定慧調三事約世間陽上陰下隨世俗故右陽居下右陰處上者欲將定靜之法鎮於陽散也世俗既有威儀此卽是以戒法禁約麤獷卽對戒也二陽動相陰靜相以靜鎮動是制亂方便卽對於定三者右表方便屬權而居下左是實智居上是則自權而顯實此卽表慧此戒定慧還約十種行人云云舉舌向腭爲防難故爲止言語故從一至十是數門成就息念不外向是隨門不澀不滑調和得中是止門下去

是三門如文赤肉心起一脉生四大脉趣四支各起十脉合四十脉一支十脉復起百脉就根本合四百四十脉今但取四支四十爲言也又取頭十脉就根本四脉故言十四脉止應舌至鼻喻如江海通流若是肝氣青肺白脾黃腎黑唯有心赤而不見是畧耳諸氣來會鼻失本色故如琉璃息細八寸亦是定將散表八正道此中六妙門凡應有十科意今只是一相生妙門也若此中觀者只是通明觀也從佛告此大精進去是別明六妙門前六妙門通凡夫三乘共觀故言通今三乘未合故別觀六妙門也第一明聲

聞六妙門者卽爲二一從大精進去是歎六妙門從
汝等善聽去是勸勸文爲二一勸二受行今明勸者
當自攝身明戒端坐正受是定觀苦是明慧苦者只
報身是苦聚生來無主爲空命盡故壞取此爲欠也
若無常爲初取念無常也五門者此有三種一五處
止爲五門卽五輪禪也此經云於節節間皆令繫念
卽是其義二五方便爲五門禪今明念佛一門餘者
數息不淨因緣慈心等而毘曇無念佛但云界方便
破我見足數息等爲五門今明界方便乃是因緣觀
破斷常等見而猶闕念佛是故用念佛等爲五門此

經文云得念佛定卽是其義三無常苦空無我寂滅
五門卽如此文苦空無常是其義也若五輪爲五門
一向是繫念於色屬定若無常等爲五門一向就理
是慧若五方便合用定慧復次開五停心觀爲六妙
門開息方便出隨止二門何以故數息有三種也合
不淨慈心兩方便爲一觀門因緣方便是還門念佛
是淨門何故爾念佛有法身佛法身卽是空理淨故
也又合五方便六妙門爲三障數息是報風故屬報
障慈心不淨因緣治此三障各有三如數息是覺觀
覺觀三種卽有三治云云患有三種欲有內外云云癡有

斷常性云云業有浮沉惡境云云如是治法亦有三治之
具如禪門云云今經不用此等治但明一空無相如幻
如化以入實際徧治之云云第二從寒林中卽是受行
又爲二一奉行得意二斯那聞下簡三乘人六門寒
林者卽是無漏清涼也金是慧三乘人同入第一義
法性理故如金第二斯那問卽是第三番六字章句
意也眼見色卽有三種初一念時是獨頭無明一念
轉卽與相應無明共起若順色卽愛違卽瞋平平卽
起無記事中攝住者但數息不令三種心起卽是也
理中論若根塵爲因緣析此因緣分分無常生滅以

見理者卽如毘曇見有得道也若觀根塵淨虛不實
空平等見理卽是見空得道若觀根塵無明因緣諸
行老死卽是緣覺人攝住此六根不次第於義無失
今言色香味觸與細滑相應者五根微細皆寄身根
法塵意根若領納法塵時身已虛有諸觸備至故言
色香等與細滑相應細滑卽身也六根例作理釋通
別圓意云云地無堅者如實故言無堅通教觀地如幻
如鏡像有堅又四句責責見細理鄰虛是有見空卽
是無見乃至四句深著不可捨皆名爲堅今蕩此四
執除此四過求不可得故言地無堅水不住四句故

風無闕者豈無四句質闕是身出火者慧解脫人但有無漏火俱解脫人備有事理火慧人燒子縛身因俱解脫人燒果縛身果見十方佛是聲聞破惡成辟支佛住不退是菩薩言服者結成意也

請觀音經疏

音釋
闕 牛代切 與變同 虺 許偉切 腹也 螫 施隻切 行毒也 蠱 丑邁切 毒蠱也 腎 時
切 木 臧 才浪切 臧也 隼 聳尹切 鷲鳥也 齧 倪結切 啞也 螟蛉 螟也 蛉也
經 郎達切 脞 五各切 與脞同 脾 類彌切 土藏也

請觀音經疏闡義鈔序

此疏自智者演說章安記錄古來人師無聞贊述既傳授道息後學往往有不知其名者知其名而未嘗披其卷者於乎斯文之未喪也一綫爾吾不肖而實痛焉吾如默默則何以傳後遂因疾間輒約文敷義筆之為鈔凡二卷庶申明於大旨開發於童蒙也既成乃作序以言其由復作闡義之名以名之
皇宋三葉登封之明年歲次己酉孟夏哉生明於南塔上方病中序

請觀音經疏闡義鈔卷第一

宋 錢 唐 沙 門 釋 智 圓 述

請觀音經四字是疏之別名疏卽通名以解釋諸經
通名疏故以別簡之略標四字疏者疎也決也疎理
經文決擇義趣也然智者釋經解題稱玄義解文稱
文句玄文合成一部者則題爲疏今卽合者故題疏
焉天台所住之山智者能說之人昔隋煬皇帝時爲
晉王旣從大師受菩薩戒乃依地持經立師之號號
爲智者也大師者大乃褒美之詞師者教人以道之
稱古者或解行可軌於人人必稱之爲大師暨唐懿

宗朝補署行焉自茲厥後雖有其實莫敢名者說者
縱辯而談非秉筆製述也斯文旣是弟子章安記錄
故不書諱而書其美號也弟子者資則捨父從師敬
師如父師之謙讓處資爲弟是知弟子之名韞乎敬
讓故師名資爲弟子在於讓也資亦自稱爲弟子在
於敬也雖有異說今依淨名疏焉頂法師者諱灌頂
字法雲臨海章安人而云頂法師者此疏元無記者
之號後人狀之故不書其諱是禮也如法華行儀法
界次第旣大師親撰故皆自書名諱至于諸部凡弟
子記其言者皆云智者大師說耳又如涅槃疏旣經

荆溪治定故亦書云頂法師撰此爲標式來者宜則
之禮云二名不偏諱謂二字之名不一一諱也故今
稱頂而不稱灌又如大師之諱智顛今稱智者止諱
一字耳偏其諱非古也後世之節制耳然則詩書不
諱臨文不諱講者具稱故無咎也法華有五種法師
一受持二讀三誦四解說五書寫今章安卽解說人
故人名爲法師也記者記錄師言也次入文此下分
節科旣別行不復編入人法者請觀世音菩薩人也
消伏毒害陀羅尼法也若約自行應先法後人以諸
佛所師所謂法也觀音由悟法成道故今約化他故

先人後法以法不孤運弘之在人故觀音說所證之
法治他三障之毒故經題先人而後法也人是下無
緣之慈超彼生法故曰至慈道過凡小故稱大士離
二邊惡故曰至良治障不虛故曰神咒大士卽能說
之人神咒卽所說之法至慈則顯大士之德至良則
美神咒之功群機卽月蓋及毘舍離人也能必對所
若以群機爲能感觀音卽是所感觀音爲能應群機
卽是所應今聖沒所感目爲能應凡沒所應目爲能
感各從功力以能爲稱故知凡由理具三千故能感
聖由三千分顯故能應消伏等者消謂消除伏謂調

伏三障通名毒害經云消除三障無諸惡力卽是用
又生善故言力滅惡故言用此咒消除三障用也顯
發三諦力也正體卽三德此間等者以陀羅尼是梵
語翻就此方名遮持也三義卽持名持行持義二邊
卽生死涅槃故知三德之理卽寂而照故能持卽照
而寂故能遮用卽下此疏釋題凡有三番俱論三義
一能說人二所說法三經總題人及總題在下方辨
法有二義正在此文故至別釋但直爾解總別二文
互現其義大師說法之巧也章安秉筆之妙也然今
部通四教而三番三義並約圓論文之旨故應修門

故深收淺故佛元意故說者觀者宜乎思擇事者下
三文皆直示毒害以顯消伏虎狼等者卽經云逢值
虎狼師子及毒藥刀劍臨當刑戮稱名誦咒而得解
脫者皆約事消伏也五住謂三界見爲一三思爲
三足根本無明成五皆昏煩之法惱亂心性故通稱
煩惱卽名此煩惱爲虎狼等經云淨三毒根不被三
毒等卽約行之明據也故下疏釋虎狼引金光明十
地猶有虎狼之難蓋此意也修一心三觀破五住惑
卽約行消毒也法界無礙者三諦一心名爲法界生
佛互融一一咸徧故云無礙無染而染者淨名疏云

中道自性清淨心不爲煩惱所染本非縛脫不染而染難可了知卽是衆生迷真性解脫起六十二見考彼言義允合今文若消今文應云法性之與無明徧造諸法卽無染而染全理性成毒名理性毒由理毒故卽有行毒事毒也今觀諸法唯心染體悉淨卽神咒治理性之毒卽下經云皆入如實之際也若爾與約行何別答前約行者是約智斷智卽能斷斷是所斷五住斷處名消行毒今則不爾專約諦理理非能所但由具惑卽是無染而染名爲毒害惑卽法性卽是染而無染名爲消伏是則惑性相待非關智斷或

謂性惡是理毒者毒義雖成消義全闕若無消義安稱用耶若云有者應破性惡性惡法門不可破也五重下注云云者次第辨示不假先列名者下辨示五章夫釋名總論三法體宗用別論三法教相分別三法人法爲名者請是能感觀音是能應卽感應宗消伏毒害明其力用卽救危拔苦用也陀羅尼明其正體卽法身體也釋名總論其在此矣靈知至爲體者經通四教理有徧圓若論正體唯取圓理靈知寂照皆法身卽照之義然雖寂照不二菩薩旣從觀智立名以所從能乃以照義爲體例此若以止定爲名者

應以寂義爲體靈知卽法身靈明本覺寂照謂靈知是法身卽寂而照也應知三身並常三諦俱照從勝從本且指法身又體性本一有種種名故使諸文明體隨文約義名字不同法華正約開權乃以實相爲體涅槃既是示滅卽用性淨涅槃爲體普門旣談一身乃以靈智合法身為體靈智卽報身以報合法二身明義乃真身也至若今經三聖降臨旣表三德故以法身為經之體又普門品明隨類現像此經明聖主來儀約身義便故於辨體俱立身名感應爲宗者月蓋致請爲感三聖遠降爲應教興由此故以爲宗

然諸經或以因果爲宗但於今經明義不便何者因果語通凡聖各有如舍離人致請求救爲因未來證道爲果此凡有因果也觀音昔在凡地爲因今居分證爲果此聖有因果也今以凡雖有因果但以感爲名聖雖有因果但以應爲名故以感應爲宗也救危拔苦爲用者以舍離病苦危若倒懸以大悲救拔令平復如本雖亦與樂拔苦爲正大乘爲教相者包含曰大運載曰乘教則聖人被下之言相則分別同異雖部談四教而三教大乘爲其正意三義往簡者以約修行始終三義收盡謂依教修行行成契理以三

義俱有通別故有通別之名此三乃通別二名之義
旨也若以位分卽約教屬名字位人稟教生解故約
行屬觀行相似依解修行故約理在初住分證本理
故然於約行復須從容若論造修猶居名字的取行
成方名觀行凡當辨位須知此旨教者下釋此三義
約理約行皆對理性而爲通別行別同歸理一名異
唯初約教不對理明聲聞者聲謂所聞之聲教卽八
音四辯也聞卽能聞之機用耳識攬別也大論云耳
根不壞聲在可聞處機宜旣異所說則殊所說旣殊
諸部乃異此經彼經各有名故故曰名異餘弟子卽

三乘賢聖問智論云佛經通四人說謂弟子諸仙諸
天人今何言非答爲佛卽可同稱佛說如今經觀
音說咒身子說四大同入實際以佛卽故皆名佛說
入道多途者至理虛通目之爲道諸經稱四悉機示
其入理之路不獨一類故曰多途觀門有異者如法
華四安樂行爲入理之門今經以數息等爲入理之
門又四教四門不同俱是異義契道者謂契會真道
卽入初住分證三德之時也至此位時修性一合無
復分張故云同歸一理理者卽向觀門所契之理也
真如者體非妄僞故言真性無改異故稱如不虛名

實至極曰際非生死相非涅槃相故名實相阿黎耶亦阿賴耶此云藏識以能藏自體於諸法內藏諸法於自體內故此皆一心三諦之異字也問何不用第九淨識爲詮理之名耶答大師依地論明阿黎耶識是眞常淨識不立第九若依攝論黎耶是無記無明隨眠之識九方名淨是知二論隨機故異若就即義唯至第八猶云即無明是法性也若就離義乃立第九猶云斷無明即法性也若曉今宗理應無諍不即不離一體無殊而即而離何妨兩立喻之波水大旨可知人法下明來意也陀羅尼是三德即所證之法

觀世音即能證之人自既已證三德今說此咒令他亦證三德是則法假人弘人因法立相成相即不可暫分今順經題約化他義故先人大法是自請者斯那問身子根境相應攝住自爲入道之門故是自請月蓋爲舍離重病故是爲他佛說偈付囑流通爲護正法此之三種皆名請觀音也若約經文則爲他居初今約義便故先列自請以自請意狹爲他次廣護法最廣從狹之廣而爲次第也問斯那請身子說六根如來付囑八部何名請觀音耶答觀音遠降意在說治障之法斯那所請亦爲此法如來付囑八部亦

只令此法久住於世約人雖殊法門無異以法顯人俱是請觀音也三請對三聚戒中應以第一對攝律儀第二對攝善法瓔珞經云律儀戒謂十波羅夷戒疏云攝律儀能令心住此與斯那自請義合瓔珞云攝善法謂八萬四千法門戒疏云攝善自成佛法此與如來護法請相應瓔珞云攝生成就衆生此與月蓋爲衆生令得安樂戒疏云攝生成就衆生此與月蓋爲他請相應是故今經二請卽是三聚此三聚名出方等地持而文云自請是攝善法護法是攝正法者或是文誤或別有據若得下示三戒本融前文旣對二

聚此中止會一名亦恐文誤應云自身戒明淨卽是攝律儀定慧明淨卽是攝善法明淨卽相似分真亦義通觀行引華嚴者諸法唯心戒定慧三卽心而具我心旣爾生佛咸然彼我互融故無差別由無差故故佛以所證說示於我我心旣淨還能化他三聚之義於斯著矣方知三請其體本融二傍下云云者自行爲正如斯那爲他爲正如月蓋護法爲正如如來傍正互論必具三請後世行者思齊在茲致至也祈告也干求也要心者要謂要期皆出下引證旣先明自請合引斯那請文而引月蓋者文顯易見故傍正

而論三請互具互引無在域限也限意專請觀音不在餘聖也行請者雖不標心以行淨故自然感聖即行淨是請故名行請證請亦然念佛三昧如般舟經三昧成時見十方佛在空中立等蓋言雖不標心而證理時自見觀音也行請位在觀行證請位在六根及初住也標心一請位通深淺身業下例示口意各具三請也向文雖云三業無瑕而正在身業開口業倒身可爾意業云何說標心等耶答若依今經觀心心脉即見觀世音是標心也若依法華涅槃但觀心性實相入觀行等位自見觀音者此既初不標心則

是行請證請然此論請皆約見彼應身若標心無感乃由過現緣淺非今請義不標而感此由過現緣深是今請義標心復感其旨可知此聖既然諸聖例爾且衆生三業互有強弱強可爲機故於三業各論三請足前十二者謂自他護法各具延祈願三是十二也問護法既是如來付囑何故亦約三業論標心等請答經雖付囑而行人豈無爲護正法請觀音耶九界論請者乃至三教菩薩爲除界外三障須請圓教觀音也佛界須料揀者應問云九界可爾佛界云何請耶應答云名字觀行即佛爲除分段三障故須請

分證之觀音相似卽佛爲除變易三障亦爾於分證中位位互作乃至等覺爲除三障請究竟觀音此約圓中五卽俱名佛界也若剋取究竟位爲能請者以衆生斷惡機在觀音故須請也則如經云爾時世尊憐愍衆生覆護一切重請觀世音菩薩等菩薩皆具衆德者圓證實理故具衆德文殊具云文殊師利此翻妙德以見三德佛性不縱不橫故稱妙德大經云了了見佛性猶如妙德等彌勒此云慈氏一體三慈無所不攝故以爲名至論下明體性本融釋成皆具衆德義也是故德慈智三一體異名展轉互攝以二

德三慈三智無異體故無緣種智並從勝說中體雙照慈智俱三但返下明隨機立號宜聞者卽隨其所聞有四悉益所以各立一號同是因地者同是真因也各說身因者涅槃三十二云五百比丘問身子云佛說身因何者是耶身子答云汝等亦各得正解脫自應知之何緣方更作如是問有比丘言我等未得正解脫時意謂無明卽是身因作是觀時得阿羅漢果有說愛有說行乃至飲食五欲如是五百共往佛所各說已解身子自佛誰爲正說佛言無非正說三十二者淨名中初法自在菩薩云生滅爲二不生不

滅爲不二乃至支殊說云無說無示爲入不二共三
十二人若兼居士默然則三十三也同入下五百比
丘四八大士能入雖異所入無殊約跨節論五百趣
實例如觀經疏云四四十六同趣常樂也一理者萬
法雖差心性常一故云一理所以亦異者義趣別也
此則理體雖同義異名異如理有徧照義故立觀智
之名理有徧攝義故立慈氏之稱名義雖異只是一
理故云不離於理也釋別名中應先分二段初約境
智釋應次約界業釋機總別釋者總釋卽境智合辨
別釋卽境智開說言破立者以觀世之名本是界外

不思議境智隨順機緣亦爲思議境智而皆絕四離
百慮人於此起四性執故須先破四執旣破四悉被
物則藏境智成乃至圓境智成故須後立破者下先
且標立境智之名以爲所破世卽三種世間也今問
下境智相望各有四句在文可解自境故境等者謂
境自是境智自是智不相因也此是自生者若云境
自是境者境不因智照是境自生若云智自是智智
不因境發是智自生此中但難初句餘三例之故云
等也若欲備難者次句應云若由境故智是智他生
若由智故境是境他生何者自境故境旣稱境爲自

以境望智智卽是他今境從智生豈非他境智亦如是若合故境合故智者此則境不由智故境亦不由境故境智境因緣和合故境智亦如是此卽共生共生有二過墮自他性中若非智非境故境故智者此則離境離智無因緣而辨境智從因緣尚不可得何況無因緣耶此四並是妄想推計故須破之問佛法皆云因緣和合何故破共生答爲定執故亦須破之四執破已四說無過中論所破者論云諸法不自生亦不從他生不共不無因是故說無生龍樹旣破那得如前四種執一爲是餘妄語乎六十二見謂我大

色小色大我小卽色是我離色是我四陰亦爾三世五陰總成六十不離有無故六十二皆邊見攝今於境智起四見者實八十八使具起略言邊見及三受耳若具論者隨執一句謂我知解此法法中計我卽身見執初三二句墮有邊執二四二句墮無邊乃六十二見所攝卽邊見也如此妄執不當道理卽邪見執此是實計爲涅槃卽見取果盜謂此爲道依之進行卽戒取因盜有三苦者樂受有壞苦苦受有苦苦不苦不樂受有行苦樂受則愛等者謂執一種境智爲是若他讚歎心則愛著生喜而心樂卽貪使苦受

者若他違逆則忿怒生瞋而心苦卽瞋使不苦不樂
卽不爲毀讚則在癡使等分亦在三使中收又我解
此境智他所不解以其所執矜傲於人卽慢使旣執
此爲是今雖不疑後當大疑卽疑使是則十使宛然
皆從所執境智上起將此歷三界四諦則有八十八
使就思惟歷三界則有九十八使今於五利略舉邊
見五鈍略明四分者從要而言以四句境智皆墮一
邊依此所執皆生三受其相易見故且明之如向細
論備九十八故下文云知句句中九十八使名識病
也八萬四千塵勞者真諦三藏準十使經以貪等十

爲根本謂貪乃至戒取一一有九隨眠一卽成十十
卽成百前後等分各一百成二百置本一百就前後
二百中又各以十使爲方便二百卽成二千一百約
五類衆生謂多貪多瞋多癡著我思覺五品各二千
一百卽成一萬五百配已起未起成二萬一千又配
貪瞋癡等分此四各有二萬一千成八萬四千也今
云四分開出者惑數雖多四分收盡畢竟空寂者無
四執故無依倚者以空寂故問意者理旣空寂何故
有道滅因果耶答意者但識知苦集不爲四執滯礙
卽名道諦所緣空寂卽是滅諦知四下示道諦相汗

穢五陰者止觀明九種五陰一期色心名果報平平
想受名無記起見起愛名兩汗穢身口意業善惡分
二變化示現名工巧三善根人名方便四果名無漏
今於境智起見起愛故云汗穢不受卽觀受是苦也
餘二存略道品等者等取三四二五七覺八正也又
正下示滅諦相也卽以能觀爲佛所觀爲法境觀不
二爲僧三義一心卽同體三寶也覺了卽能觀三觀
四執卽所破妄惑法性卽所觀三諦境觀不二故云
和合而於正勤心中示滅諦者以道品約位則正勤
是小乘內凡位也以小準大卽圓六根相似證滅無

所住心等者謂大聖人內無四執外順機緣令獲四
益說境智異謂若人樂聞自生境智卽說境是自境
智是自智以赴欣欽之心或宜聞生善或說必破惑
或聞則悟道他共無因亦復如是故使經論所明若
境若智不出自等列名中四教境智俱順四悉別教
獨得名者以出假位正以四悉化他故圓名不思議
者則顯前三教皆思議也然四境智皆是總釋觀世
二字應預知差別則至文易了前二以心生六界二
種世間爲境而智有體析之殊別教以心生十界二
種三間爲境用次第智圓教以心具十界三種世間

爲境用一心三智一切法從緣者證境智因緣皆是實有破析方空也但有名字者謂瓶已破首已斷但有瓶首之名實無其體此喻出大經是字不住卽性空亦不住卽相空法眼等者卽十行出假說四教四悉境智也雖無境智等者法從心造全法是心本自無諸法寧立不有而有三千宛然無始不覺理具情迷今旣覺了知心卽是不離能觀別有所照而於一心強分境智故曰而論經言下境卽所觀照卽能觀能所一如故皆云不思議欲擬者大師尚謙表無專執久祛四執者以得無所住心故慈悲等者被

偏圓機示四教像是故向約四種境智以釋其名故經下引證也維摩經身子問天女云汝於三乘爲何志求天曰以聲聞法化衆生故我爲聲聞以緣覺法化衆生故我爲辟支佛以大悲化衆生故我爲大乘觀音天女俱分真故故得引證別釋中若依名字爲便應先明觀智次辨世境若解義爲便前明世境次辨觀智以先有境可得論觀若未有境何所可觀譬如鏡鼓後方映擊今從義便故先境次智三諦三境者止觀明理性是一對止名諦對觀名境諸文所明諦卽是境不二別今亦同之所以然者諸文但云

三觀不論三止故且止觀行門方乃委示一因下列
名此之三境者謂此三境不一不三唯在一念徧攝
諸法三無差別彼彼互融但以情迷不能覺了遂於
無縛法中強生繫縛謂有情無情事異理異於無脫
法中而妄求解脫遂厭苦欣樂捨有入空離二邊求
中道故有凡夫生死及三教境智之異故云爲智所
觀卽爲四也四種觀者經云下智觀故得聲聞菩提
中智觀故得緣覺菩提上智觀故得菩薩菩提上
智觀故得佛菩提今家釋義用對四教以聲聞是下
乘藏是最下教故聲聞菩提卽藏教也緣覺是中乘

通教復居藏別之間菩薩是上乘別教仍居通教之
上圓教復在別教之上故云上上中論可知終是三
諦之境者根有徧圓迷成四境若論本理三諦常融
開爲二觀者卽前藏別二觀俱觀俗諦答下俗諦雖
同藏見麤相別見細相故分二別真亦淺深者前三
果分見故淺四果究竟故深亦互爲淺深旣分麤細
二俗應有淺深二真理則無二者見有淺深真空但
一偏真旣爾中真例知此淺深之言不可用通教複
真消之以文云理則無二若約複真灼狀是二故知
答意各從當分等觀下云云者應通前結數前約自

他護法等能所合辨有七十八今歷四教觀法觀之
則有二百十二請也次明智下者夫境智一法不分
而分故前釋境乃對智明今文釋智還約境說是知
境非智莫顯智非境莫成義雖相仍文有傍正觀因
緣下標藏智觀因緣空標通智二諦觀者假是虛妄
俗諦空是審實真諦今欲去俗歸真故言觀因緣空
假是入空之詮先須觀假知假虛妄而得會真故言
二諦觀出假下標別智從空而出故言出假入在假
內亦曰入假故出入二名諸文互立別雖三觀以假
爲正平等觀者望前稱平等前破假用空今破空用

假破用既均故名平等中道下標圓智雖三觀一心
從勝彰名故指中道三皆名觀復名智者通而爲論
觀智義一別而往目因果兩分世智下斥凡夫也以
凡夫外道通有此智不出生死不動煩惱故云是世
間之智也但有名字者以此世智虛誑不實但有智
名而無其體故向云亦名名字智也凡聖通用者謂
凡夫用此智得四禪八定聖人二種不同慧解脫人
但用無漏智得成無學俱解脫人俱用二智斷惑之
時隨用一智故云凡聖通用也以此智凡聖等有故
向云亦名等智也但此下結斥也菩薩下顯菩薩也

於此觀中者指世智也既不斷惑但用世智而能觀
無常修六度成其勝解終出生死慈悲喜捨卽四等
心也慈故與樂悲故拔苦見彼離苦得樂故喜不求
恩報故捨不擇怨親等用此四故名四等具一切法
者卽六度四等萬行具修也三十四心謂八忍八智
斷見九無間九解脫斷思如旃延子者卽釋論引迦
旃延子明菩薩義釋迦初爲陶師值昔釋迦發菩薩
心行六度行也三藏境智觀音者菩薩自伏六蔽悲
心熏物衆生稱名卽能脫苦自行六度慈心熏物應
可度者卽能示現令得安樂也雖行於空等者菩薩

從薄地學遊戲神通多修假觀八地出假故名不住
於空初心謂見地也爲如佛者被接之人能破無明
無明破已如通佛地同得八相故名爲如不同通教
等者別人破空出假不同通入空心出假扶習潤生
知空非空在六七住破空出假卽十行位塵沙據所
迷之法無知約能迷之心四念處云十住斷見思又
斷界外上品塵沙十行中品十向下品今論中品也
行滿者以經論所明別教位次等覺二位或有或無
今約無說故云十地行滿稱理之觀者別次第觀尚
非稱理藏通析體不稱可知三諦圓融本性自爾順

性而觀故名稱理既下示稱理相從初至後者初
謂名字依解修觀名名字觀音後謂妙覺究竟顯理
名究竟觀音五卽位殊圓觀一揆五住圓除者謂二
惑俱破也問十信位中旣兩惑先去何名五住圓除
耶答圓觀心性麤垢自去故四念處以治鐵爲喻是
故圓觀一生之中初住可獲若次第行者借使一生
兩惑先除雖不經歷亦成次第或圓接別或別接通
或解圓行漸並兩惑先除俱非今意今文的取圓頓
行者故曰圓除妙覺觀音者問觀音是等覺因人何
故約妙覺極果釋耶答觀音三昧經云此菩薩已成

正覺號正法明佛觀音受記經云次當補處稱爲普
光功德其本迹若此約究竟釋理應無失問別名可
爾通號如何答文雖不明例有此釋謂名字菩薩乃
至究竟菩薩也大論云衆生無上者佛是況菩薩衆
生華梵之異名通極果文義在茲此之三智者并世
智有四以世智是境故但云三亦對五眼者三智旣
約四教五眼亦狀肉天眼二眼照麤細事皆是世智悉
爲諸觀境本卽同中論偈初句也藏教觀音不斷煩
惱故唯約世智二眼也若約二乘從此入析法觀斷
惑亦得慧眼又菩薩於三祇百劫得五神通獲法眼

分別根性調熟衆生今以別教望之只名世智二眼
通唯慧眼別唯法眼其意亦狀照真卽一切智故對
慧眼卽通教也照假卽道種智故對法眼卽別教也
藥卽道滅病謂苦集照真俗實相卽一切種智此眼
卽佛眼也三法真俗中也俗攝肉天法三眼佛眼有
五眼用故曰一而異名小般若云如來有肉眼不答
云有乃至有佛眼不答云有今經云五眼具足成菩
提皆此意也但從勝受名云佛眼耳譬如衆流入海
失本名字大論云十智入如實智無復本名但稱如
實智五眼具足而但稱佛眼三智下云云者應釋出

開合所以四觀謂大經四種十二因緣觀下中上上
上彼經通取析法故明四觀大品瓔珞直就摩訶衍
但明三觀三智今若開二經合涅槃者應開析法從
假入空觀生滅一切智也若合涅槃就二經者下中
觀同是一切智也若將三經若開若合對五眼者肉
天二眼皆是世智爲諸觀境本若三觀三智從此境
卽入體法一切智若四觀四智從此境卽入析法一
切智今約菩薩不斷惑邊故向以世智對藏又藏教
滅事方空旣存於事故對世智中論偈初句對藏卽
此意也餘眼對智及觀悉如向文收攝下注云云者

凡諸經論所明名相束廣開狹常使成三三一三
互融互攝攬入已心以成妙觀乃知十方佛法不離
刹那世者不約界業釋機若論爲幾王在音字若不
連世其義莫顯以十法界是生機處故就文分二初
通明世義差別隔異者於此十中有凡有聖有大有
小有權有實二報三業高下不同名別名異世是下
別顯爲機世是色者又闕心字於十法界各三世間
假實屬正國土屬依今云色心且指五陰實法也假
名攬陰而立國土乃陰所居故舉色心足該餘二色
卽觀世身等者謂若約大士自行觀五陰空而成聖

道則應名觀世身及觀世意旣名觀音卽是觀彼十
界衆生口業爲機故云音是機也此約化他立稱此
文且以身意在應口業屬機若具足論各備三業三
俱在機者如五體投地燒香散華身業爲機大士往
應卽觀世身繫念數息意業爲機大士往應卽觀世
意祈請口業爲機大士往應卽觀世音二俱在應身
意如向若約口業卽是大士自觀音聲而得成道由
自行成故能應物此釋機應各三與普門玄義或異
者符今疏文也言菩薩等者蓋西竺語倒此方則云
大道成衆生也謂自求廣博大道又成熟衆生釋論

下初發心卽自求大道度一切卽成熟衆生能忍成道事者不同二乘忽忽取證不動下魔不能動小不能破有種種成者名通四教故因緣道卽藏菩薩空道卽通菩薩假道卽別菩薩第一義道卽圓菩薩文闕假道二字又於諸道者卽前四道然文但不藏教通別餘三略無直修因緣如直行六度及四無量心不修無常觀不發四弘誓者但是人天之因旣亦名道故須揀之今言道者乃別顯菩薩修出世之道故云起慈悲等若通菩薩應揀二乘自證之道別揀但從空出之道圓揀次第之道今菩薩卽觀音本修圓

行故能於一道觀一切道一行修一切行故至分果隨機利見四應不同自非觀心三千三諦者其孰能至此乎豈有捨一取一者問如菩薩本修圓行則捨偏小何言無取捨耶答取捨卽無取捨以圓觀權實不離心性豈可捨心性取心性耶以唯見心性故狀菩下雖知本具當體空中而無所得故無難苦及無分別爲機亦異等者明鏡是一現像自殊現像不同良由形對故順四機有茲四應以喻合法其旨可見他人下問答合在釋別名後而在此者或隨便或文誤問意者設云菩薩二業俱觀機者意輪鑒機此義

可了身口是色云何鑒機故云身口若爲觀聖觀智
觀前人等者上觀去聲下觀平聲卽是意輪觀彼十
界身口之機則可名觀世身觀世音也非是聖人用
自己身口觀他也以身口但能現身說法故然實觀
三業之機彼旣正以身口爲難故不云意但言觀前
人身口也通亦得者上約別論觀機唯意若約通義
則三業本融六根互用則聖人身口何妨觀機但除
下病謂妄情法謂三障妄情若去障體元真若破三
障卽是破德故但除病不除其法蛇虺者虺亦蛇也
爾雅云蝮虺博三寸首大如擘注云身廣三寸頭大

如人擘指此自一種蛇名爲蝮虺螫音哲又音適蠱
田界反螫蠱毒也蛇虺如三障毒如妄執今遣妄執
如除毒不逃三德如不侵人三障本真如不殞命如
世咒蛇之法但除其毒耳調善者謂調惡令善也堪
任乘御者大經明咒師咒毒龍等堪可乘御非殞彼
命也隨應得度者以性惡不可斷故故至果上爲機
所扣現四惡起身

請觀音經疏闡義鈔卷第一

音釋

綫

私箭切

煬

余章切

顛

語豈切

蝮

音蝠
蟲名

浙江嘉興府楞嚴寺般若堂本年貴刻
觀心論卷一計字九千八百十
該銀五兩六錢一分
康熙三年八月 日

石界又灌葛通寸寸也

請觀音經疏闡義鈔卷第二

宋 錢 唐 沙 門 釋 智 圓 述

次約二義釋消伏者前約一義唯就圓論今約二義
偏圓合辯部屬方等故須兼含消除即不斷是圓義
消滅即斷是別義滅謂死滅如殞蛇虺之命也此斷
不斷若約界內外即四教也界內斷即是藏不斷是
通界外別圓已如向說除伏即斷平伏即不斷前以
除對滅則滅死除生今以除對平則平無所移除猶
收動故須以平對不斷也不無輕重者有人三障俱
重須此三番有人報障偏重餘二障輕但治其重輕

經

請觀音經疏闡義鈔卷第二

者隨去餘例可解無礙陀羅尼者如法華明三陀羅尼一旋卽旋假入空二百千萬億旋卽從空入假旋轉分別三法音方便卽是二觀方便得入中道解一切言音亦能一音說法隨類各解得此三者卽入無礙陀羅尼具足一切陀羅尼故云第一也三昧或三摩提此云正定王三昧者卽首楞嚴等百八三昧皆中道一心名王三昧也然陀羅尼是慧性二昧是定性不二而二故分二別因中修一心止觀果上證此二法法華疏云三昧與陀羅尼體一而用異寂用爲三昧持用名陀羅尼今引大論正顯此經神咒是中

道無礙陀羅尼也又引王三昧者意明此慧卽定不二而二二而不二耳遮三障等者以遮惡不起是消除義故經云消除三障無諸惡持善不失是調伏義故經云五眼具足成菩提咒卽是願者卽解經題咒字義謂大聖說此陀羅尼只是咒願衆生如佛譬若蒲盧咒蜈蚣也然則陀羅尼旣是梵語咒字卽當華言經題華梵雙舉故云陀羅尼咒若爾何故云陀羅尼翻遮持耶答古人見祕密不譯例如此土禁咒等法便以咒名往翻然亦不失遮持之義何者咒旣訓願如菩薩四願二願拔苦卽遮惡義二願與樂卽持

善義故知咒與遮持義歸一揆經者教也者謂經卽
言教訓法訓常有翻無翻俱指舊釋卽古來人師解
義也今唯訓教則四教俱經言略意周不埃餘說餘
疏卽指普門玄義也然雖指彼不無小異辨體不同
已如前記又彼此雖俱感應爲宗彼是法華正約圓
機感於圓應雖明三教意在開權今經方等帶偏明
矣彼明普門示現乃以慈悲爲用則與拔雙明此顯
舍離求救乃以救危爲用則拔苦爲正彼明教相卽
偏而圓此明教相偏圓相隔宜在區別無得雷同四
義旣指餘疏而復辨感應之宗者以今經以感應爲

要機通十界應通四教各備四句其相難知故此略
示四句者一冥機冥應二冥機顯應三顯機顯應四
顯機冥應若過去善修三業現在未運身口藉往善
力名爲冥機也雖不現見靈應而密爲法身所益不
見不聞而覺而知是爲冥益也二冥機顯應者過去
植善而冥機已成便得值佛聞法現前獲利是爲顯
益如佛初出世最初得度之人現在何嘗修行諸佛
照其宿種自往度之卽其義也三顯機顯應者現前
身口精勤而能感降故月蓋曲躬聖居門閭又如行
人道場禮懺能感靈應是顯機顯應也四顯機冥應

如人一世勤苦現善濃積而不顯感冥有其利此是顯機冥益若依法華玄義更開四句以成三十六句機應等在彼文詳之題下譯人名者司馬氏都於建康是曰東晉竺難提此云喜西域人也以第十一主恭帝元熙元年歲次己未至此土翻傳焉或時等者卽他人分經今依前者今師以第四咒是護經故屬流通生起三段如別文者光明疏云序本序於正通正本正於序通通本通於序正卽生起也居一說之初者如是等六事在一經之首故神光駭集者如法華放光動地淨名合蓋現土駭驚也集謂集衆言論

激發者如法華文殊彌勒問答釋疑淨名寶積說偈述歎皆名述叙引例云云者他經爲例如向引文若的約今經則以舍離病苦爲由月蓋請佛爲述同有次序者六事同故應云由藉叙述各異不言叙述文略耳如他經多以瑞相爲由騰疑爲述此經以重病爲由求救爲述故云各異此則束前三序爲通別二序也初釋次序中疏文存略通指舊解今依諸疏六義科釋一切諸經皆以此六居首者大論云佛將涅槃阿難問佛一切經首作何等語佛答阿難應云如是是聞一時佛在某方某國土與某大眾非獨我法

如是三世佛經初亦然故知六義卽是通序初如是者卽所聞法體也佛如法相而說阿難如聞相而傳故言如也佛如法相而解阿難如海量而受故言是二我聞者卽聞持之人阿難與聽衆述佛遺旨親承不謬故云我聞三一時者聞持和合也衆生感法佛慈赴教機應之時故云一時四佛者能說教主也佛陀此云覺者知者謂自覺覺他覺行圓滿自覺異凡夫覺他異二乘覺滿異菩薩五住毗舍離者此云廣博嚴淨其國寬平名爲廣博城邑華嚴故名嚴淨觀解者一心三觀能觀心性猶如虛空卽具福慧二種

莊嚴無染無著菴羅樹園者菴羅是果樹之名以樹目園故云菴羅樹園其果似桃或云似柰此樹開華華生一女國人歎異以園封之園旣屬女女人守護故言菴羅樹園宿善冥熏見佛歡喜以園奉佛佛卽受之而爲住所觀解者三觀觀心心性不動而修道品因起悲誓善根牢固成諸總持卽住園也疏云如是者者應云等謂等取餘五事也大林精舍等疏文唯存理解然向下消經多無事釋隨病隨機凡有四意一執教忘行二得事失理三義易觀難四情局性徧示行示理從難從徧且就理明義例明一家觀心

不出三種謂約行附法託事約行則存乎止觀事法則徧在諸文然應深曉止觀所談心性三千徧攝一切大小理惑智行位教若依若正不離已心方了諸文隨事表對其旨有歸是知觀雖有三意唯在一以附法託事扶成約行耳今釋大林精舍卽附事觀心也故萬德之言並約已心非指他果若指他果必迷自境若了心境自卽他故他卽自故不了此境自尚成他况觀他耶問淨名疏釋毗舍離等皆約三義一事釋二約法門三約觀心直爾表對是約法門以三觀攝事方名觀心今疏以包含二諦故名大等乃是

約法門釋應非附事觀心答文義隨便不可一準以淨名經中有法喜爲妻等文云諸佛解脫當於衆生心行中求既有二文故分二釋若諸文只以法門表對卽是觀心如止觀普賢白象方等旛壇此皆直爾表對法門而義例指爲附事觀心故須隨文豐約唯變所適故今所表卽是觀心包含二諦者卽邊是中故曰包含萬德下果上萬德因理本具故指本具名爲叢林精無八倒者中道精純非二邊雜故離常無常等八種倒也如涅槃卽大經陳如品觀色不淨者應云觀色淨不淨淨卽有不淨卽空獲得常色卽

是中道真常能破二邊此真常亦名非常非無常也
今文從略若具論者應云觀受是苦是樂因滅是受
獲得常受乃至觀識常無常因滅是識獲得常識仍
是且論常德樂我淨三亦復如是今於五中略舉色
陰故云觀色於八倒中略舉不淨於四德中略舉常
德具論必備也五陰是所執之境八倒是能執之心
四德是所顯之理此理顯處卽此五陰名五涅槃一
陰通除八倒者約境界觀總而論故觀一陰能除八
倒十八空者空唯是一破十八有名十八空謂內空
外空內外空乃至無法有法空也重空觀者以中道

正觀空生死之有空涅槃之無名重空觀也經與大
比丘去第六聞持之伴此證阿難與大眾共聞豈謬
傳也所以先聲聞次菩薩後天龍者二乘滯空凡夫
滯有菩薩不滯常行不二故處其間有五下云云者
應分經爲五一數二位三歎四名五結初數中與者
共也千二百五十者三迦葉有弟子千人優樓頻螺
有五百伽耶有三百那提有二百身子目連有弟子
二百五十人迦葉舍利弗等先並事火翻邪入正便
得上果感佛恩深常隨侍佛故爲同聞衆也比丘此
翻除饑衆生薄福在因無法自資得報多所饑乏出

家戒行是良福田能生物善除因果之饑乏也或言
無翻名合三義一破惡者如初得戒卽言比丘以三
羯磨發善律儀故言破惡二怖魔者既能破惡魔羅
恐其出我界域化我眷屬故生驚怖三乞士者出家
之人內修道德遠離四邪告求資身故名乞士此之
三義通初後心經家所列皆後心耳二位阿羅漢此
翻無著或言無翻而合三義謂不生殺賊應供也無
明糠脫後世田中不受生死果報故言不生九十八
使惑盡故名殺賊具智斷功德堪爲人天福田故言
應供三歎中五句經文初二句約所破歎次二句約

能破歎後一句約果用歎初所破者卽世間因果也
諸漏是因後有是果諸漏謂三漏欲有無明也成論
云失道故名漏律云癡人造業開諸漏門毗曇云漏
落生死論律語異而同明漏義漏盡是因滅也後有
卽二十五有生處也現因既盡後果不生是果亡也
次能破者卽無漏定慧也如鍊真金者珠叢云鎔金
使精曰鍊煮絲令熟曰鍊故字宜從金疏云是總歎
者卽總歎修定學慧猶如鍊金數數入定轉轉明淨
也又鍊金是約喻歎澄靜是約法歎喻總而法別也
合云澄卽歎慧靜卽歎定今云澄卽歎定等者文誤

色界下約有漏無漏解諸定也四禪四空是有漏定
八背捨是無漏定前三背捨者一內有色相外觀色
位在初禪能捨自地及下地故名背捨二內無色相
外觀色三淨背捨身作證後五背捨者四虛空處背
捨五識處背捨六無所有處背捨七非有想非無想
背捨八滅受想背捨此八通名背捨者智論云背是
淨潔五欲捨是著心故名背捨若發真無漏慧斷三
界結業盡卽名八解脫故云故知得解脫等者身心
澄靜也云云者謂八勝處十一切處等諸無漏禪皆
是身心澄靜也經六通無礙是果上之用也六通謂

天眼天耳知他心宿命身如意漏蓋四名經文略舉
十三尊者身子智慧第一故以大智標之舍利弗具
云舍利弗羅此翻身子以母好形身身之所生故言
身子又翻珠子其母於女人中聰明聰明相在眼珠
珠之所生故名珠子時人以子顯母爲作此號新云
奢利弗咀羅奢利云鶯卽百舌鳥亦云春鶯弗咀羅
言子以母才辯喻如鶯鳥此是彼子以母顯之故云
鶯子曰捷連姓也翻讚誦文殊問經翻萊扶根真諦
云勿伽羅翻胡豆二物古仙所嗜因以命族新云摩
訶沒特伽羅此云大採菽氏上古有仙居山寂處常

採菘豆而食因以爲姓尊者之母是彼之族取母氏
姓因以爲名得大神通揀餘諸姓故云大採菘氏名
拘律陀拘律陀樹名禱樹神得子因以名焉新云從
父本名名俱利迦亦云拘隸多摩訶迦葉此翻大龜
氏婆羅門種其先代學道靈龜負仙圖而應從德命
族故言龜氏又翻飲光上古有仙身有光明飲蔽日
月迦葉是彼之種以姓爲名故名飲光言大者簡餘
迦葉摩訶迦旃延此云文飾亦云扇繩母戀此子不
肯改嫁如繩繫扇新云摩訶迦多衍那須菩提此翻
空生生時家中倉庫等皆空占者言吉因空而生字

曰空生或云善吉阿菟樓駄亦云阿那律亦阿泥樓
豆皆梵音奢切此翻無貧昔於饑世贈辟支佛稗飯
獲九十一劫果報充足故名無貧新云阿泥律陀此
云無滅劫寶那此云房宿音秀父母禱房星感子故用
房宿以名生身也又翻房宿音風佛與同房宿化作老
比丘爲之說法因而得道故云房宿慈恩云房星房
星現時生故僑梵波提此翻牛呵無量壽經稱牛王
增一云牛迹過去因摘一莖禾數粒墜地五百世作
牛償他今雖人身尚作牛蹄牛呵之相新云笈房鉢
底此云牛相畢陵伽婆蹉此翻餘習五百生中爲婆

經

續藏經卷之三

九

法三

羅門惡性麤言今雖得果餘習尚在如罵河神故名
餘習新云畢輔陀伐蹉薄拘羅此翻善容以色貌端
正故也年一百六十歲無病無夭有五不死報後母
置熬盤釜中水中魚食刀破皆不死昔堅持不殺戒
故九十一劫命不中天昔爲貧人施病比丘一訶黎
勒服已病除故今無病新云薄矩羅難陀此翻善歡
喜亦云欣樂亦喜根本是放牛之人因問佛放牛十
一事知佛具一切智獲阿羅漢果阿難陀此云歡喜
亦慶喜世尊成道內外咸慶當喜時生故名慶喜羅
睺羅此翻覆障真諦云羅睺本名修羅能手障日月

翻此應云障月佛言我法如月此兒障我不卽出家
世世障我我世世能捨故言覆障新云羅怛羅此翻
執日所以新舊語殊者皆由五天之境方土不同梵
策傳來方今有異例如此土後漢都於洛陽東晉遷
于建業儻漢籍先傳於身毒必以北音爲正晉人後
往於竺乾必以南語爲正故於所說不無矛盾以此
明之古來梵語未必盡訛略也五結衆所知識者聞
名欽德爲知觀形敬奉爲識菩薩衆下注云云者應
分經爲四一數二歎三名四結約因者且如圓教初
緣無作發心至等覺邊際智滿悉名爲因隣果者佛

果如十五日月等覺如十四日月相隣近也大智下
總釋四句此之解行悉在分真目足備者目故能見
喻解足故能行喻行目導足行故有所至涼池喻三
德涅槃也若約下三教當分俱有大義若望圓教前
三非大故大論云我今如力欲演說大智彼所實相
義當知大智卽是觀諸法實相之觀也亦有一切智
下恐闕道種智三字總別之異名者觀中道是總照
二邊是別卽別而總邊卽中故二智卽一切種智卽
總而別中卽邊故一切種智卽是二智三智圓融總
別一體例如下舉小爲例十六諦卽四諦下十六行

也四諦是總十六是別總別雖殊只是小教一切智
耳意顯圓教三智總別不同只是圓頓一切種智修
行爲語者約自行也從行以入理者卽住前修行至
初住位分證本理趣本之行故云本行化道者約化
他也故引勸學證之從本起行者依智修行也是則
智爲行本智家之行故言本行如般下彼經旣皆勸
學般若驗知無智諸行不成則是從大智本一心具
足諸波羅密也金光明云一切種智而爲根本無量
功德之所莊嚴亦此意也當知稟教生智以智導行
行必入理故與前釋共爲表裏珠爲寶本以珠喻智

以寶喻行皆成下釋皆悉成就也約四種等者謂四
菩薩果雖未滿因行已圓故言成就藏初緣生滅四
諦發誓名大智行六度名本行相業成名悉成就通
緣無生起誓名大智檀二事空乃至般若名本行十
地如佛名成就別緣無量生解名大智行無量波羅
密名本行等覺名悉成就圓緣無作發心名大智一
心萬行名本行等覺智滿名悉成就是則解行俱成
就故云皆悉大經下六波羅密中雖有智慧由在地
前非是真證故屬福德登地真證乃名智慧真雖有
福從勝故也以證此文滿足六度唯在福德六中智

慧則約地前五度通真故並屬福故今福慧悉在分
真故云成就及以滿足今依下標示也諸度卽六度
以修六故根方調伏如金下約圓正明金剛至檀義
者彼雖通二今唯約圓捨色名檀者所捨乃同能捨
則異由能捨異故分教殊今之能捨卽圓三觀檀義
下明檀義該攝言攝三者三字恐誤應云攝六金剛
論偈云檀義攝於六資生無畏法此中一二三是名
修行住無著云若無精進疲倦故不能說法若無禪
定卽貪信敬利養染心說法若無智慧便顛倒說法
故約下述意也由檀攝六故今但約檀釋又經下明

檀以慧導無慧導者不趣菩提有慧導故卽成正覺
斥無方便者卽無慧導也三事皆空者謂不見施
物施者受者若準下疏文卽以根塵識爲三事也若
是下簡小也無方便空者不能卽空是假是中名無
方便菩薩下顯圓也是空亦空者以有段中方便故
不滯於空卽是能空於空故曰是空亦空由有方便
故無染著而能下由無染著故卽空而假具修萬行
通達佛道者達彼萬行卽三諦理乃由此智引趣菩
提但眼下結示三性若論本性自具三因眼根卽中
是正卽空是了卽假是緣今作一性二修示之但眼

之本等者卽指本具中理爲正因此卽合性爲一也
了此等者謂修觀了達也能捨下謂不著三事方捨
塵勞此乃合修爲二以說若各開者了眼亦具於三
能捨亦具於三也荆谿云智亦具三照本有三福亦
具三助智嚴本約此下類通三法略舉三種應知一
切三法皆三因之異名四位者位應作教字之誤也
下文放此分別一切色者卽十法界色也色非色不
二者色卽是事非色卽理事理相卽如波與水故云
不二事祇理淨事卽是理故云常淨問一家談理既
具性惡何名淨耶答性中之惡惡全是善理體無差

豈應隔異如云清具濁性濁全是清珠具寶性寶卽是珠思之可見調伏下云云者應以諸根例眼釋出如思益下約眼根明餘五度也應各論四教於中廣略不同忍進備四禪分大小戒慧二度雖則直明義亦含四不爲六塵所傷者今約眼根應言不爲色塵所傷言六者通舉耳凡夫著色則爲所傷無防非義三藏了色無常通了卽空別了假名圓了中道四教當分俱不爲傷能忍至名忍標示忍義從順也於因下約四教明忍捨六下標示進義應云色塵眼根言六通舉也亦於下約四教明義云云者謂藏了根塵

生滅通了卽空故不染雜別不染雜於空圓不染雜二邊是精義也離憂下標示禪義初禪下約四教明禪也初約四禪卽藏通後得六根互用卽別圓他住初禪等者約支林功德以辨也初禪五支一覺二觀三喜四樂五一心二禪四支一內淨二喜三樂四一心三禪五支一捨二念三喜四樂五一心四禪四支一不苦不樂二捨三念清淨四一心心與定法名一心支四禪俱有心及定法故具有此支三禪有喜支今云除喜未詳六根具禪者從便言六意具顯眼究竟盡者藏通究竟盡見思別盡塵沙圓盡無明當分

而論各名究竟如是下總示向文正顯眼根六度也
八相謂下兜率託胎降生逾城降魔成道說法涅槃
以諸佛垂應皆示此八而成佛道也威儀者左傳云
有威可畏謂之威有儀可則謂之儀論四下明四教
俱有佛威儀也謂三藏後心通十地別初地已上圓
初住已上此四種智慧覺了俱能八相成道名佛威
儀而非具也何者別教妙覺但圓第二行藏通極果
唯齊六根故並非具然前三教果上無人今之所論
且約權說但名下具佛威儀但名其圓教等覺耳問
等覺未極何得言具答果雖未滿因行已圓故得云

具各有大義者如前以四教釋大智也二雖名大望
圓仍小故云而非究竟也今中下正示圓智乃名如
海列名者雖歎勝德不的顯名莫知其人故略出七
人皆的約中道者約事則繁就觀釋名足知大況經
文殊師利此云妙德若見佛性卽具三德不縱不橫
故云妙德童子者內無法愛如世童子情無欲染寶
卽下實智者常住不移寶可貴重故表實相實智權
者暫用還廢如月盈復虧故以月表方便權智也月
光約智斷者從一日至十五日光漸漸增譬智德從
十六至三十日光漸漸減譬斷德卽涅槃月喻三昧

義也經寶積者觀心雖空具足萬行萬行衆寶積之於理故云寶積經曰藏者中道正觀如日具足諸法名藏衆賢位極者等覺名賢讓極果爲聖也佛是聖首等者四十二位俱名爲聖妙覺爲其上首居聖人之極經十六人者卽賢首之同類也經彌勒云慈氏無緣大慈攝諸法故然諸菩薩俱具諸德引物歸心各彰一號能如是解乃於自心見諸菩薩淨名云諸佛解脫當於衆生心行中求斯之謂也列凡夫衆者順古立名也若準今家應云雜衆以其中凡聖兩兼道俗相間故卽有八部名四種衆者卽經云四衆天

龍八部天謂欲色諸天龍是畜趣正報似蛇依報如天亦能變爲人像八部卽四王所領東方領二鬼捷闍婆富單那南方領二鬼薛荔多鳩槃荼西方領二鬼毒龍毗舍闍北方領二夜叉羅刹共領八部不令惱人四衆者舊云出家在家各二合爲四衆此名局意不周今於一衆更開爲四卽各有當機等也當機是五百等者宿植德本緣合時熟故謂當機五百卽同類五百長者也後得道卽斯那等發起謂權謀智鑒知機知時擊揚發動成就利益如月蓋致請及下文身子白佛云佛說禪定第一等影響謂古往諸佛

法身菩薩隱其圓極匡輔法王雖無爲作而有巨益
結緣謂力無引導擊動之能德非伏物鎮嚴之用過
去根淺三慧不生現在聞法無四悉益但作未來得
度因緣也經人非人者人卽四衆非人卽天龍等或
云人非人是疑神經恭敬圍繞者修謹曰恭崇仰曰
敬周迴曰圍坐徧稱繞或作行遶卽表機動四句者
一戒乘俱急戒急受人天報乘急見佛得道卽此經
天人在會是也二戒緩乘急戒緩生惡趣乘急值佛
得道今龍鬼在會是也三戒急乘緩戒急得人天身
乘緩不得值佛設得值佛亦不聞法得道如舍衛六

億及著樂諸天不來聽法皆是也四戒乘俱緩戒緩
墮惡道乘緩無解脫期釋由序中初標文出意就事
下分二初約事消經如淨名疏中者略如前記經舌
噤渠飲切謂不能言也眼主等者白虎通云肝繫於
目肺繫於鼻心繫於口脾繫於舌腎繫於耳故知經
云舌噤無聲卽心脾二藏病也無聲是口不能言故
主心病此卽肉團心也腹內爲病者腹屬身故意識
卽慮知心也五根不利者根應作藏字之誤也謂五
藏不利外應五根成病惱也此約病從內出亦可下
約病從外人如久視久聽乃至飲食皆成病故具論

者外人乃是病緣入傷五藏五藏既病外應五根五根亦病也夜叉新云藥又此翻勇健能飛騰空中舊翻捷疾鬼致令國人病惱者卽是鬼爲病緣由鬼氣外陵五根入傷五藏五藏成病還應五根經鈎牙上出者鈎或作狗字之誤也經律異相賢愚經觀佛三昧海經並作鈎牙鈎字從金從才並通喪大記曰妻於夫拘之經典釋文音溝古經字或從才故誤爲狗字也經吸人精氣者普門疏云人心中有七滴甜水和養精神鬼噉一滴令頭痛三滴悶絕七滴卽死二約理重釋一念三千卽空卽中彼彼互徧故云無邊

三障卽三德障性是善故云性善十種下以十種行人釋一切人民也十種行人不出三諦法界如一切人民不出毗舍離國受苦報人卽人天受苦者如廣嚴重病之比亦攝四惡趣世間善法卽人中行五戒十善之者二乘則兩教合說菩薩則四教開論愛見卽界內見思藏通內外凡別圓外凡俱未斷故而致病者卽依三種色聲等致貪瞋癡病也變易土者卽方便實報別位三十心者且總舉耳七住已上方生方便土受變易身也圓教十信及藏通斷惑盡人同別三十心別教登地同圓初住文雖偏舉而義必具

攝地地者所依曰地通指諸位皆有愛見者卽界外
同體無明也四句卽四門是無常等等取兩亦雙
非常卽有門無常卽空門餘二可知是事實等者以
已解一門爲是斥他解三門爲非問月蓋屬何行人
答經是方等不可定屬應知月蓋本是第十或示爲
圓教初心或通示前八推理起見名爲夜叉見不出
五故經云而有五眼五見如前記鉤牙等者牙旣從
下向上能傷害人業亦從見而起傷害法身因見起
業爲生死因業體黑闇故云如墨經五百長者風俗
通云耆年德艾事長於人以之爲長者也彼國有五

百家悉曰離車傳禪

去聲

爲王離車翻傳授國政蓋由

此矣此五百長者共行道法率土人民莫不歸德而
月蓋爲首者爾時爲國主也故維摩香積品云於是
長者主月蓋從八萬四千人來是也經頭面作禮者
智論云禮法有三一者口禮二屈膝頭不至地三頭
至地至地名上禮也耆婆此云故活影堅王之子善
見庶兄柰女所生出胎卽持針筒藥囊爲世醫師也
謂此爲是爲術也者以已執爲是斥他執爲非也因
緣事相卽攝有見外道外之妙術者外謂外道非四
句外不能救治等者初一但醫身病後三醫心反增

見愛之病五眼不明者眼應作根明謂明利外爲五塵所侵故不明利云云者謂十種行人爲見愛所害故請觀音觀音亦十種不同經天尊者諸天世人無能過故故曰天尊亦曰世尊古者譯經一名互用唐杜行頊譯佛頂最勝經皆稱聖尊

請觀音經疏闡義鈔卷第二

音釋

揆

巨癸切也

埃

牀士切

閻

苦本切

咀

當連切

音笈

極擘切

輔

力刃切

身毒

身音捐毒音篤

矛盾

子莫切

盾並兵器

子

薛荔

梵語也此云俄鬼莓

闍

石遮切

康觀三年般若堂刻

請觀音經疏闡義鈔卷第三

宋錢唐沙門釋智圓述

呀引者呀家之引正說如呀三序如引降臨者周禮云臨謂尊適甲也生起意者因序中用蓋致請故佛示能除毒害者在於西方由示方所故勸祈請由祈請故聖降由聖降故授楊枝由受楊枝故爲說咒西方去此等者語出大經彼文乃是東方不動世界指此娑婆云西方去此二十恒河沙若論安養卽如小彌陀經云過十萬億佛土也今但借其語勢以爲難辭何故下問也一解下答也他解約應而失於機故

不取也今解不爾者據佛對告長者云去此不遠乃約機緣不同他人約應論不遠也雖近而遠者如舍衛三億不見不聞其猶八音至近曠者不聞雖遠必應者如今月蓋祈請二聖卽降有若天月至遠水清卽現時謂時節方卽方所數謂數法佛教所談其理寂絕無時方數故五陰十八本持十二入之法不能攝也若外道法中計有時等卽爲三科所攝後漢安世高翻經謂十八界爲本持也但隨下真理雖無世諦說有如律中令內弟子時食時衣是有時也今云正立西方是有方也五行者行天之氣也老聃云天

有五行水火金土水分時化育以成萬物西卽是金者東木南火西金北水中土若對四諦者謂東集南苦西道北滅故云卽道諦也道是能通等者道是戒定慧能破惑通至於理如金能決斷也用智慧見理者此解道是能通義也慧能見理故是能通理卽所通也此言下正顯西方觀音以表道諦觀卽種智故云大智三德互融故云無礙消此之毒卽智能破惑通至於理卽能通義日從下東出表生善入西表滅惡生滅兩機者謂生善則機在東土滅惡則機在西方故云在此二土二種無量者謂三身爲生法二身

亦名真應二身有量之無量者夫應之爲義機熟則生機盡則滅終成有量但以人天不能數知故言無量若釋迦八十之壽既可數知則是有量中之有量也光明疏云有量有二義正由此矣法身無量者法身卽真身今明二身則合法報同名法身也以報法體一故在因則境觀不二在果則法報相冥故光明疏云智旣應冥亦非身非不身請觀旣亦二字足驗體同法報體一常住不變故無限量故云此是無量之無量也俱是法身之無量者二佛俱得法報之常身故彼此二佛俱能應長應短但此釋迦應穢土機

緣宜短故生身是八十及七百阿僧祇也彼彌陀應淨土機緣宜長故壽無量也而實有數者非人天所知云無量爾旣觀音補處驗有數也狀則光明談山海之壽是釋迦能現無量例此彌陀亦現有量也故光明疏云應佛皆爲兩量逐物參差長短問光明談山海之壽故以常果爲宗若例彌陀終成有量則是無常何云常果答池水深則蓮花大法體常則應用遠山海是常體之用故談大用足顯體常以斷信相執八十無常之疑也而彼疏從容以報身當品題者取其上冥下應義便爾實明應身能爲常也者闡凜

師者謂耨耨寺凜法師故有優劣者以此之穢形彼爲淨故彼優此劣而同是應土若作下破凡二意一有動移故非真二未極淨故非真不復得移動等者此初意也真理寂狀無去來移動無淨穢優劣經說彌陀從彼來此彼優此劣豈是真耶若彼下次意也若是真身應居寂光極淨之土既法說三乘人分九品雖無四趣而有人天故於同居尚未極淨據此則不可謂是真身也故云此則不可故淨名疏明二十七品淨土彌陀止是第六而諸經偏讚爲淨者形此土故由物機故是攝生故令專注故宿緣厚故約多

分故此語則寬者以久本今迹俱應身故此一往許之也二往不可故云今亦不用以無經文明說故曰那知須知二佛各有久本今迹也那互爲者責他以彼爲本以此爲迹今明下示今正義彼此俱是應土但淨穢不同今此穢土機緣破惡宜在淨土之佛以淨破穢是對治故互爲優劣者此土爲劣淨土爲優同居爲劣方便爲優實報寂光準說可見互有消除者穢土見思毒害請淨土佛消除淨土塵沙毒害請有餘土佛消除有餘無明毒害請實報土佛消除故云互有此亦一往應知淨土衆生若機在釋迦亦請

此佛如十下舉十人示互有消除相十種垂應者受苦報人及修世間善法者但感事相觀音乃至修圓者感圓通觀音此八人皆是同居穢土感同居淨土八種觀音也變易二人者別三十二心感實報觀音垂應圓初住感寂光觀音垂應也十種西方者初入唯見事相乃至第十見如虛空例此娑婆亦應十種如淨名經明身子與梵王所見法華常在靈鷲山等但據多分衆生爲其取土故彼淨此穢於中機緣不無異見佛佛道齊於茲信矣十種消伏約拔果報苦乃至破無明說之此土至令請者因緣和合能破三障

故一法標名者隨機各立一號也今欲下明須請之由由表三德故須俱請今此土衆生欲消伏三障毒害必須外假勝境之緣顯發自己法身之理彌陀勝境旣表法身故須請也而此法身爲感所覆今欲顯發須修觀慧照了此理除其惑障觀音表慧故須請也然慧不孤運假福資成勢至表福亦須請也釋迦欲令衆生顯發本理學慧修福故請三聖密以表之對治義強者以愚癡故見有苦相若有觀智則達苦無苦今由病苦正須智慧以爲對治故用標題得意具三者觀爲顯理必假福資故略標一名卽具三義

大悲至之境者無緣大悲普覆一切卽法身也申三業之機者五體投地等是身業繫念等是意業當請彼佛是口業無創等者創與瘡同禮記頭有創則沐字皆此作大經云如人手瘡捉持毒藥毒則隨入若無瘡者毒則不入瘡卽菩提因緣毒卽第一妙藥五體投地者二肘二膝及頂俱是體分悉至地也衆生之本體一者衆生心性與佛無別故云體一義同父子天性相關母字誤也子拜其父旣表報恩衆生拜佛義亦同也薩婆若此云一切智相內觀心性與果智合離薩婆若卽心隨妄境也與常理合者與五常

理合也逆理謂逆五常理戒是色法者應云色是戒法文之倒誤也無作冥密者由作以發無作不與色心相應而在第三聚攝故云冥密左陰右陽者夫左右陰陽因於方所東南屬陽西北屬陰此方之禮君父師南面則左東右西則左是陽右是陰西土之禮三皆東面則左北右南故左是陰也涅槃云譬如四方北方爲上上卽左也推晝顯現如陽之明思數在內如陰之暗五識在頭者眼耳鼻舌俱在頭故身雖徧體頭亦身故平倚者倚立也名爲惑者不與理智相冥唯隨妄我慮知之執則是全法性爲無明也五

受陰卽是五夜叉也若依至心地者則是投地作禮
義也五分之名通大小乘今意在大義亦兼小以通
十種行人故悟虛智者悟法空之智也行陰招累者
百論疏云心王了其總相心所了其別相以識創起
但緣青等總相次取境界卽是想心次領納前境卽
是受心次起貪等煩惱造作卽是行心前三但是無
記未能成業行旣成業故云招累因滅下滅九界無
常五陰得佛界常住五陰也斷結毒害者結卽煩惱
故喻臭穢亦是止善者掩臭如不殺等雕麗者雕文
飾也禮云其民雕題家語云器不雕僞華能嚴麗如

福能資慧也行善卽放生等定中下定無慧無以深
其寂慧無定無以窮其照若別對等者示別對之失
法身皆名爲慧者慧應作香字之誤也華嚴以五分
法身皆喻香故豈得無定者五分有定身故此示以
香獨表於慧之失也七淨者一戒淨二心淨三見淨
四度疑淨五分別淨六行淨七涅槃淨此七名七覺
淨華大經云定水湛狀滿布以七淨華也戒是戒學
心是定學餘五慧學豈得無慧者此示以華獨表於
定之失也而別下結責也佛言通表豈宜別對故言
下引證未許火爲緣者以火喻受戒作法也定慧亦

爾者例戒學各具作無作也對此下云云者對止行
事善及戒學無作作兩善是約前二行人論表法也
對定慧則約後八行人論表法也故前明定慧舍大
小偏圓界內外義凡論表法意令行人睹對香華無
忘自己戒定慧耳不了此旨唯數外境何所益哉合
消等者表所消毒害亦十不同如初行人以香表不
殺等止善應以臭氣表四惡趣業乃至第十行人以
二住所破無明爲臭氣也所以下三業次第應先身
次口後意而經文以意居次者以先須期心故默念
之請卽願請也不風等者有聲曰風守之則散結滯

曰氣守之則塞出入不盡曰喘守之則勞不聲不滯
出入俱暢名息守之乃定禪門明用息不同有三一
師教繫心數出息一師教數入息一師教入出無在
但取所便入定無過卽用皆不許出入俱數行人欲
行此法應以數息爲意十息爲一念者數息一門有
修有證安庠徐數從一至十攝心在數不令馳散是
名修數覺心任運從一至十不加功力是名證數能
如下明證數下中二根所證卽欲界定禪門云欲定
有三一麤住二細住三證欲界定麤住者因前息道
諸方便修習心漸虛凝不起緣慮名爲麤住細住者

於後心泯泯轉細卽是細住當得此麤細住時或將
得時必有持身法起此法發時身心自狀正直坐不
疲狀如物持之乃至經一坐久無分散意名欲界定
如今下根人心定亂止卽麤住也未到地定者禪門
云此欲界定後身心泯泯虛豁失於欲界之身坐中
不見頭手牀敷猶若虚空此是未到地定所言未到
地者此地生初禪故也喜發等者喜去聲好也以今
經行法是六妙門故故禪門云自有衆生慧多定少
爲說六妙門六妙門中慧多故於欲界初禪中卽能
發無漏未必備至上地諸禪也一切禪卽有漏無漏

亦有漏亦無漏非有漏非無漏禪也卽將下標十種
而下文但明八者變易二人無報息故然數息是一
由觀法別故成十人故不定止觀有通修觀別一章
若數數時者上數所角切頻也下數如字下文云所
數數息亦爾不保不愛下藏菩薩也知色數者色應
作息字之誤也在緣謂攝心在數不謬亂謂從一至
十無相等慧者無相慧卽通第六度等卽等取前五
度然通與藏體析有殊六度無別故接藏文略言智
度以智導五俱成卽空等慧應云慧等不定空故破
空出假不定俗故破假入中觀此息非空非假者了

息唯心猶如幻化故非假息性具足諸法故非空法
身之光如如者法身遍一切處照如如不變故名光
耳智慧之光照了者卽是智能照境稱境而觀境智
不二也因此法身等者因如來法報一如究竟圓極
能起大用故令衆生得見應身之光也狀此應用不
離法身普賢觀云釋迦牟尼名毗盧遮那涅槃云吾
今此身卽是法身故約法報解應身之光也釋神力
中初約事解卽是釋迦神通之力也狀大聖施爲事
必表理義須兩備故事理二釋俱云或可也如來祇
是真如等者以真如解如以神力解來以明如來神

力也此真如有神力者神名不測力名幹用不測則
天狀之理深幹用則轉變之力大乘此神力而來者
謂乘真如而有應身故曰而來卽乘如實道來成正
覺也不動下解往毗舍離也舍離之處卽是寂光故
云不動此寂光土唯佛究竟故云至實相等廣包百
界萬善莊嚴故曰廣嚴住此下解住城門闔初釋住
字住此者謂住實相之地以無緣大悲遍覆法界憫
念衆生爲除三障毒害故云住也城卽法界者謂法
界爲城防涅槃之非禦生死之故心性唯一故云不
二含受一切無所隔礙稱門遍一切處無非門也佛

證此理常住不變故云住此門不動令衆生等者自
既證此理亦令衆生證此理也經門闡三蒼云闡門
限也如如卽智等者謂境卽是智故云如如卽智此
智還照於境也並云如如者謂智如如於境界如如
於智卽境智不二之稱也具楊枝等者以觀音左手
把楊枝右手持澡瓶是故國人授此二物而內表兩
因也定是緣因慧是了因慧能除惑故以拂動表之
定能止散故以澄滄表之說文云水止曰滄對上消
義者如文云消名消除又云但除其病不除其法故
今以拂除對之如物上塵但除其塵不除其物拂打

者打丁領切對上伏羲者伏名調伏又云調善令堪
乘御也此並對前約一義解消伏也又拂下對上約
二義也消滅卽斷入涅槃消除卽不斷入涅槃此中
但對二消不對二伏者在水四義中具明故或是文
略應云一拂除對消滅之消除伏之伏二拂打卽對
消除平伏醒悟者水能灑悶獲醒也懺悔方法者夫
懺法有三謂作法取相無生前二是事後一是理今
經燒香散華五體投地等卽作法也於現身見佛授
手及疾疾得見觀音等卽取相也皆悉入於如實之
際無生也此之十意皆是作法無生理觀不可暫忘

取相一種任運自現今時行人都昧心源專求好相
據此希求恐落魔境故禪門云夫見相者忽狀而觀
尚邪正難知逐文作心求之多著魔也問若爾不應
觀相懺悔答觀相者但用心行道功成相現取此判
之便知罪滅非謂行道之時心存相事而生取著若
如此用心必定多成魔事已上禪門文八意出在經文者
第一第八人師義立滅後歸依必假形像等故須莊
嚴道場披陳過罪此經無文雖有破障之語自是顯
經力用故此二意人師加也備於事理者如前疏釋
五體等悉是理解是知約理卽無生所攝云云者謂

此十意且依古師若準今家十意少別今師依經請
後楊枝古人則以請居後第十坐禪今爲誦經以第
四數息卽坐禪故旣闕誦經故今加之古人但見經
云數息繫念向下又云修五門禪遂將數息坐禪以
爲兩科不知數息卽五門中數息一門也今家十意
具在百錄然此經行門於四三昧中卽非行非坐三
昧亦名隨自意三昧然約諸經修行事儀雖殊理觀
無別事儀則各依諸教理觀則同用十乘若非十乘
終無所到故止觀修大行中事儀廣而理觀略正修
中理觀廣而事儀略後之理觀必用前之事儀前之

事儀必用後之理觀文雖互出用乃同時今之疏文但爲釋經至於修行須依止觀爲三下前二咒觀音說後一咒釋迦說皆是毒害者三障損三諦故皆是煩惱者報名煩惱果業名煩惱因卽三障皆是煩惱也皆是惡業者報名業果煩惱名業本卽三障皆是業也皆是報法者煩惱名報本業名報因卽三障皆是報法也不無輕重等者雖俱稱煩惱以惑心昏亂義重故別受煩惱障名雖俱稱惡業而三業繫縛義重故別受業障之名雖俱稱報法而陰身謝因義重故別受報障之名故云分爲三障悉具三障之語者

此卽通義狀通中有別故判三咒各破一障如破煩惱障中經文雖有業報之語是知業是煩惱因報是煩惱果耳捨修取正祇是破惑心煩惱障也餘二例

知兩意

者一俱重二互有輕重也悉須三咒者以三

障俱重故子縛卽煩惱障猶償狗齧者業報俱在也遇失業因遭今狗齧如法顯傳說取食聖沙彌爲彭城吳氏家犬所傷等例爾者或業除而煩惱報在或報除而煩惱業在斷其重者者重卽貪也輕卽瞋癡此三俱屬煩惱障今以此文明斷惑有輕重之殊以例三障也今從別義者毒害通名也煩惱等別稱也

開三顯一者二卽權一卽實亦復如是者三周俱名
開權顯實故例如今經三咒通名消伏毒害也更加
下卽初周名法說二周名譬說三周名宿世因緣說
例如今經三咒初名煩惱次名破業後名破報自有
下卽前明古人分經以正說盡第四咒也卽是下出
其義謂前三別治三障後一總治三障也若不下明
今解兼得總別者如初番咒正破煩惱重者卽別餘
二障隨滅卽總餘二例之經南無此云歸禮或云歸
命通爲衆生等者佛如醫王法如良藥僧如瞻病人
救消伏之所別緣者別在大悲拔苦之力是故別

請也三寶復有通別者三寶是通各三稱爲別謂除
三障說三咒表三德故須三稱也三釋者釋應作德
字之誤也通稱三寶旣復論通別觀音別緣亦應復
論通別以亦三稱故義可例知三業如文者稱名口
業投地身業一心一意意業苦厄下云云者中七有
分段之苦厄後二有變易之苦厄不獨下謂苦厄語
通不獨在於受苦報人也無明癡暗等者此初番咒
正破煩惱障故此文總請但云滅除癡暗也下別請
言業報者是兼破耳如華嚴下放六度光也除慳卽
施光除恚卽忍光等卽等取餘度證今滅除癡暗是

智光也又如思益經云又如來光名曰能捨佛以此
光能破破戒之心令持禁戒又光名安和破瞋恚之
心令行忍辱又光名勤修破懈怠心令行精進又光
名一心破妄念心令行禪定又光名能解破愚癡心
令行智慧今云淨光明卽是思益放能解光也覆大
地者草木皆死譬圓中一斷一切斷也次第除十人
惑者除受苦報惑時餘惑未必除故須次第如法華
玄義行妙中次第破有義此卽別教也經云殺害苦
而輔行引經云毒害者誤耳不可執彼改此況今疏
文牒釋分明仍以毒害解殺害也魔卽天子魔也魔

字字書元無譯人義作梵言魔羅此翻障能爲修道
作障礙故亦言殺者常行放逸斷慧命故或言惡者
多愛欲故將空等者以小破大也小雖出界不能化
他菩薩化他誘其徒屬空彼宮殿故害大心此證四
教菩薩有遭殺害義也將散下以事善破二乘二乘
出彼界故此證聲聞緣覺有遭殺害義也然變易二
人亦爲界外魔所害也如華嚴十魔二障如文者煩
惱卽煩惱障衆病卽報障前是大悲等者指前總請
大悲覆一切也對今施樂卽慈悲互顯前舉能拔故
云大悲今舉所與故云安樂若世下釋大樂而先簡

分樂如是等者等取二乘以證真爲樂菩薩以出假爲樂分有下皆是少分樂不名大樂至得下正示大樂不遷不變故常無三邊苦故樂四德之二也能請語長遠者謂月蓋通爲十種行人請不祇爲於受苦報人也經聞名救厄者者卽同法華觀其音聲而得解脫也十種下釋世間也皆名衆生世間者此雖舉一義必具三以五陰和合而有衆生衆生所居卽是國土而有下釋慈悲父也父子義者旣指觀音爲父衆生卽當如子衆生由理具佛性故能感觀音由分顯佛性故能感應互遍生佛無差其猶父子天性

相關也故云同有佛性如來下正釋佛性以佛性是總名三因是別名總元詮別別不離總此中三因正唯約性緣了約修於修二義稍異諸文以諸文中若論類種卽以低頭舉手爲緣乃至聞一句爲了今約俱未開悟故悉在緣故云作諸功德及云隨從化導斯則散心聞法攝在其中別取聞法人位名爲了因故云結縛得滅當知滅縛卽相似及初住也若論假名五品不無名字觀行滅義故知圓名字卽至于分證悉屬了因然此三因諸部所談進不非一如顯性錄具明天性相關者生佛各三高下互遍故請下結

示也既云免三毒苦卽是斷惑入位須廣約十人方顯高下豈止在於受苦報人也病除下約三義釋今世樂一句初義乃受苦報人言得道者卽二乘涅槃也然則豈無未來得圓頓道耶今約從淺至深存次第故況明其義至第三通約十人方爲準的又病除爲今世樂者豈無卽時悟道耶然卽時悟者乃由過去下種成熟今依觀音得脫耳今且約正爲未來下種及下種未熟者請故云今世樂所以約未來於小乘得脫爲後世樂也乃至圓教種熟脫三例亦如是未來下約二乘人有餘無餘以分今後十種下約分

得究竟以釋今後此十種行人卽時各得悟道爲今以圓中妙覺涅槃爲後然此十中前四如初二兩義已明今後此又通以圓中究竟涅槃爲後者以第十行人是初住位既爲今世須以妙覺而爲後世云大涅槃非極果如何若十人各各自論今後細作可知然非佛意佛意欲令一切同至圓融究竟涅槃故觀音深位能了此旨教令請云及與大涅槃也餘諸下結顯及與大涅槃句也涅槃是安樂法故故云方是大樂也此一句經卽是請施後世樂也師子吼者涅槃云師子吼決定說說一切衆生皆有佛性以欲知

智在說故卽般若若德也以此三德等者以印對法身
必定對般若吉祥對解脫陀羅尼是遮持遮三障惡
不生持三德善不失故三德是遮持之體也又必下
約拔與釋而不釋陀羅尼印者以印是中道之體必
定吉祥卽中道與拔之用耳消滅拔苦義者師子吼
時百獸皆死如智慧照時衆苦咸滅故大下明陀羅
尼義通顯密也除障不虛名神咒智鑒無昧名明咒
獨絕無倫名無等等咒大品以此咒名通歎顯密咒
祇是願者此釋大品咒義也願衆生如立者立應作
佛字之誤也譬如下詩云螟蛉有子果羸負之教誨

爾子式穀似之箋云式用也穀善也今有教誨萬民
用善道者亦似果羸故今以果羸喻佛螟蛉喻衆生
螟蛉桑蟲也果羸網腰蜂也俗呼爲螞蟥諸經皆是
咒者咒旣訓願是故不獨密語名咒諸大乘經顯說
皆名咒也以無非佛願衆生如佛故又可偏小之說
亦名爲咒故法華云雖說種種道其實爲佛乘則偏
圓顯密咸是咒也遮卽調伏義破卽消滅義故云滅
空滅有卽是消滅者上文伏空伏有下應云卽是調
伏無者闕文也除伏平伏等意者等取消除消滅二
也應云滅之亦有消滅除滅也卽以斷不斷對之玄

義已詳故注云云亦是禁咒咒誓者謂三德囚禁三障如世禁蛇誓者制也制三障令不起故亦是咒術術法者解上咒術祇是破三障之法耳盡與下謂上願禁誓術四義皆與一人斷障相應也密能消伏者咒是密語約前四義各具消伏實相印者三蒼云印信也檢也大論云大乘經用一實相印生死卽涅槃涅槃卽生死不二不異故苦盡下以前消滅調伏二義對釋經文也乃至有見者略三途惡業故云乃至從乃至字至廣凡五十八字當在釋第二番咒云云字下爛脫在此第三正說咒經救護衆生神咒者

無緣大悲普令離苦故名救護言神咒者新翻並云真言謂皆是如來難思秘密真實之言也然衆經所說功用不同或專用治病或專用護法或專用滅罪今經四咒則通治病滅罪護法也如般若大明咒無上明咒無等等咒則非治非滅非護也通則兼具衆德別則各順經文古來諸師解義不同今意會之不出四悉一云咒者是鬼神王名稱其王名部落敬主不敢爲非此世界明咒義也或云咒者如軍中密號唱號相應無所訶問若不相應卽執治罪此爲人義也或云咒者密默治惡惡自休息譬如微賤奔逃彼

國訛稱王子因以公主妻之而多瞋難事有一明人
從其國來主往說之其人語主若當瞋時應說偈云
無親遊他國欺誑一切人麤食是常食何勞復作瞋
說是偈時默然瞋歇後不復瞋主及餘人但聞斯偈
皆不知意咒亦如是密默遮惡餘無識者卽對治義
也或云咒是諸佛密語如王索先陀婆一名而具鹽
水器馬之四實一切群下無有能識唯有智臣乃能
知之咒亦如是祇是一法遍有諸力病愈罪除善生
道一卽第一義也有此四義故存本音譯人不翻意
在於此於五不翻中卽秘密不翻也於四例中卽翻

字不翻音也縱翻華言義亦莫曉例如典語名物物
實不知而庸俗不知聖地密言凡豈能解然此三咒
或作鬼神名號注解者蓋後代之妄作也況疏解此
咒密談三德若唯鬼號滅謗何深世行大悲咒而有
注釋者亦同此例又此三咒或改音或易文字而
言傳之於梵僧正之於梵學者非也且難提所授之
音儻與中天有異斯亦五天方土不同如摩訶摩蓋
身毒賢豆之例今旣改其神咒亦合別譯經文以梵
本不同故也陳隋之世智瓌諸師多行此法誦咒唯
依現文而徵感尤多具彰僧傳識者詳之今以古經

咒詞錄在記文庶無墜也

哆耶咄

丑加切

嗚呼膩

模呼膩

闍婆膩耽婆膩

安茶訶

般茶訶

首埤帝

埤避私切

般般茶

囉囉婆

斯膩

哆姪咄

伊梨寐梨

鞞首梨

鞞音低

迦婆梨

佉鞞端耆 旃陀梨

摩蹬耆

躡音

勒又勒又

薩婆薩埵薩婆婆耶啤娑訶

多茶咄

伽帝伽帝

膩伽帝修留毗修留毗

勒又勒又

薩婆薩埵

薩婆婆耶啤娑訶

一百字

經云怖畏乃至疾病當約十種行人消之此報身者即報得之身謂受苦報人也無明之病者無明應作

五根字之誤也眼赤耳膿即五根病也乃至圓教者中略緣覺及三菩薩故云乃至本是法性至之病者即同前文無染而染理性之毒也即病除與法性等者達無明即法性故此即染而無染是消伏義也前分行理此兼前二非是自請者佛居至極毒害已盡故既云覆護一切重請觀世音即知是為他護法也若作淨語可施於下者即受下之朝請也如天下引證也漢制諸侯春朝天子曰朝秋朝曰請故漢官儀有朝請大夫則佛如天子觀音如百官請百官即朝百官也臣赴君曰朝以觀音之法臣朝釋迦之法王

故云請觀音也又經下示經題亦通淨音可施凡下者凡下卽月蓋及舍離人朝於觀音也若準前喻則天子喻觀音百官喻凡下前是佛受觀音之朝故單言下今是觀音受衆生之朝故言凡下請語重者咨尊曰請依字音也隨意消息者正約經中重請之言也若作咨尊義卽佛爲衆生請於觀音也若作淨音卽佛重受觀音之朝證彼說咒也如如大覺卽法身之佛也以依此理說咒故第二咒

哆姪弛哆都我切 陀呼膩 模呼膩 闍婆膩 耽婆膩

阿婆熙 模呼脂 分茶梨 般茶梨般補槃切 輸鞞

帝釋都逆切 般茶羅 婆私膩 休樓休樓 分茶梨

兜樓兜樓 般茶梨 周樓周樓 膩般茶梨

豆富豆富 般茶羅 婆私膩 矧輝矧詩引切 躡輝躡其除切

膩躡輝 薩婆阿婆耶羯多 薩婆恒婆恒其切 娑

陀伽 阿婆耶 卑離陀 閉般娑訶凡十九字

各各有怖畏者乃至第十行人有下地可捨卽是怖義經云毒害準怖可知金光至之難者有二義一約生身得忍有超登十地者生身旣在故有此難二約法身菩薩住變易土則以無明爲虎狼等此中十人者十應作二字之誤也前八的有事中虎狼但變易

經
前卷下經五箇卷之三
二入無也煩惱法爲虎狼者此亦約行毒害也梵行者梵是西語具云梵摩此翻清淨葛洪字苑云梵潔也取其義耳性戒者謂不殺等十持之性自是善犯之性自是惡不由佛制方有善惡也故輪王出世則以此法化人若受佛制戒之後犯於殺等則更加違制之罪也故云受與不受俱是罪草木戒者此一向是遮但因外道俗人計草木有命見比丘剪伐謂無慈心息彼世機佛乃制戒故比丘受已犯之得違制之罪俗衆不受犯之無性罪故云不受犯不得罪經云糞穢卽十惡也設有下解設有業障也假設者業

障本空妄想故有故知業障是假設也但設者業種至多但有一法屬業障攝皆爲神咒所破也性淨下解假設義也性淨等者無染而染故曰本無今起也皆是虛假者逃理起業業不離理業體本無而言業者虛假施設耳實來破虛者實卽三德密敎虛卽惡業今稟敎達理了業唯心染卽無染心體本虛業相無寄故云皆使清淨但設下以設訓但對前成異若論業體意不殊前大品云設有一法等者涅槃之外實更無法欲徧蕩相著故假設過言過歲如幻況不過耶條然言無者以一切空寂故如十九界等等

經
取十三入六陰也以界但十八入唯十二言九言三
喻畢竟無浮虛之樂者合云浮虛之業樂字蓋誤也
與大品等者今經設有業障與大品設有一法俱是
假設之設卽語同也復爲異卽意別也彼明泯蕩相
著則一切皆空此明從理立事則有浮虛之業以此
段咒正破業障故見佛三昧爲種者外見形像由內
修觀佛三昧也地獄下約十法界所見不同乃至人
中所見者中略鬼畜修羅故云乃至通別等菩薩者
等取藏圓也所見各異者卽見佛形像不同也如三
惡道習見佛如黑象脚等三尺之身又如提謂等以

人天位見佛爲樹神等準此六道衆生並見佛不同
皆非出世相若六道中有出世機則見佛四種不同
卽是四聖法界也故大論十一引密迹經云一切天
人見佛色量或如黃金白銀諸雜寶等或見丈六或
一里藏或見十里乃至百億通或見無量無邊別滿
虛空中圓天人所見旣乃不同四趣亦爾此約多分
亦有爲圓機而感劣身如法華應以地獄身而爲說
法等凡約十種行人者卽受苦報人非但人中重病
意亦收於四趣故向云地獄人念佛等三昧觀法亦
異者卽四教不同五方便人者外凡合一內凡開四

謂煖頂忍世第一也思惟尚在者是有心病也二果
欲界殘思三果色思並是心病略而不論故云乃至
身病尚在者如身子患熱畢陵伽患眼痛習氣不亡
者如畢陵伽有慢身子有瞋緣覺侵習未深心病還
在故云亦爾六度同凡夫通教十地準四果可知故
云亦爾不言別圓內外凡者文略也生變易者變易
之言該於二上今云就無作四諦者且約生實報人
及生方便斷塵沙者若生方便未斷塵沙須學無量
四諦也五分下明身病無明下明心病約四十二位
上作淺深優劣重輕望下爲深優輕望上爲淺劣重

乃至等覺一生在皆有二病也故經下示妙覺無病
也等覺一品猶是無常妙覺究竟故五並常方無兩
病外內火卽仁王經七火也一鬼火二龍火三霹靂
火四山神火五人火六樹火七賊火人火者惡業發
時身自出火樹火者如久旱時諸木自出今云內火
卽人火也外火卽餘六也又內火卽病也病侵於身
如火燒物又是身內火大不調故爲病也故經云節
節疼痛稱名誦咒卽得除愈也病差曰愈事解如文
者若約事證如東晉謝敷南齊陸果作觀音應驗傳
所明也故言燒身者身喻見諦也兩雨者上雨字去

聲雨猶降也卽是信行人者稟教修觀斷見惑故是
思惟惑等者思不障理其實附理如須下示附理相
故言內火者以內火在身如思惑附理也處處九品
者三界九地各九品共八十一品思惑也前一下約
法行例龍雨也經明外火卽云龍王降雨內火但云
除愈今大師依義立名身病旣得名火病愈卽是降
雨義也旣以內火表思惑卽以龍王表心王心靈自
在如彼龍故無漏心王者卽指二向三果所觀無漏
之心也發得禪定法水降雨也雨能滅火如禪能斷
思問前釋外火表見道旣約信行此論修道何故作

法行釋耶答見道修道各有利鈍二根利入見道名
法行鈍入名信行利入修道名見至鈍入名信解是
則見修各有信法二行也今以初入見道稟教義強
約信爲便修道重緣約法爲便得意而論義必兼具
分段見思可解者前八人中別圓二人猶在凡位所
破仍是界內見思故云可解變易下卽後二人乃是
別三賢人斷界內惑盡已生方便及圓初住已破無
明生實報土此二人俱約界外同體見思以明內外
火義也勝妙五欲者如華嚴中無量香花雲百千禪
定也香華雲卽是變易土中欲界也禪定卽色無色

界此卽界外思惑也文闕見義應如地持等覺入離
見禪涅槃迦葉自叙云已前名邪見人皆是界外見
惑也然此見思實無異體但指根本無明障理名見
潤生名思不同界內二惑差別事解下爾雅文也飢
字或饑並通五穀者麥菽稷黍麻也或曰房散角芒
檜也譬解中四句初二句以不聞教爲飢聞教生解
爲飽次二句以有解無行爲飢解行兼具爲飽正慧
卽是正行也增益法身如五穀養色身故以無正慧
爲飢助道卽帶事兼修資成正慧楊泉物理論云蔬
果之實助穀故以無助道爲饑乃至人天善者略苦

報人故云乃至也約十人傳作者苦報無善法爲飢
人天爲飽乃至圓人分證爲飢究竟爲飽釋王難中
旣論分段變易卽是約十人明王難也四魔卽天子
五陰煩惱死十魔者牽嚴云一陰魔生諸取故二煩
惱魔生雜染故三業魔能障礙故四心魔起憍慢故
五死魔捨生處故六天魔自憍縱故七善根魔恒執
取故八三昧魔久耽味故九善知識魔起著心故十
菩提法智魔常不捨故故言下引瓔珞經證也卽等
覺後心無礙道中已伏煩惱解脫道斷卽入妙覺故
云唯有一分死魔也盜賊是六根六塵者如金光明

云六八材落結賊所止也如人得天往者從人中生
天則以天趣爲牢獄天生人中以人趣爲牢獄六道
互作故注云云當分受身爲獄者不須約所往處也
如人在人中天在天中卽名牢獄亦約十行人者前
二可知後八皆具二種獄義也故知十種行人並未
免於牢獄故須請觀音也唯佛一人出一種三界之
獄故在手名杻在脚名械二手二足各表定慧昏散
爲障如杻械也在頸名械連身名鎖枷在兩肩之上
左陰表實右陽表權見思塵沙是權障無明是實障
卽三惑如枷故云枷是權實障耳得業繩等者謂得

業繩也有部云業入過去得至未來身死得謝未
來報起如一業成以一大得得於業法又以小得得
於大得第二刹那以三大得得前二得及以業法初
念之得俱成法故又三小得得前二大并初刹那九
法成就第三刹那二十七法凡云大小得者皆以大
得得於本法復以小得得於大得還以大得得於小
得故大小得更互相得故知第三念去如是展轉得
徧虛空是則一生之中於一業思之所起得尚已無
量況無量生無量業得以至來際若經部宗得既是
假但云意與身口和合成業假立有種至未來生若

大乘中藏識盛持以至未來世雖有此異凡受報處必爲精血四大所籠未得擇滅非得已來常爲得繩之所連縛連縛未斷去已復還故今以連身之鎖表之也經五繫縛者謂頭及手足五處被繫若作所表是五分障也海是下釋入於大海也初約生死深廣如海二約法性深廣如海妄想動法性者妄想如黑風也動法性者卽是全法性爲無明無染而染遍造生死名爲波浪也經洄波者三蒼云洄水轉也經水色之山驚浪如山也取理不得者理非四句故取不得故法性下大經文也於四起定執故成毒藥達四

無四故成甘露毒故早天甘故延齡刀劔傷壞故表無常注云云者約十行人卽是二種三界皆爲無常所還乃至等覺一分亦是無常也經過去至怖畏明果由因也一切苦卽穀貴等若果也若由過去所感卽成順生順後二報若由現惡所感卽成順現報經如火燒薪者涅槃明少善能除大惡譬如少火能燒一切經三毒等畏者卽等分煩惱并上是四分授位等者華嚴云轉輪聖王所生太子母是正后身相具足王令太子坐白象寶妙金之座張大網幔乃至奏諸音樂取四大海水置金瓶內王執此瓶灌太子頂

是時卽名受王職位十地云者卽指華嚴十地品明第十法雲地也故經云菩薩受職亦復如是諸佛智水灌其頂故名爲受大智職菩薩此則唯法雲地得名灌頂菩薩也佛但法性者究竟顯理故下地不能見也理極不能思度者解十人智有頂可見也以齊已所解不能思度究竟極理也此則各以少分智慧爲頂若得下稟教進行猶被灌受職也能以等者卽妙覺觀音用法性海水普灌十種行人智慧之頂也此十地之頂也者明經云灌頂正約十地尚灌十地下位可知經應當暗誦謂柔聲默誦也此咒旣爾上

下例之然諸經事儀對機各別如熾盛光咒則令厲聲此文則使暗誦幸順佛語方契聖旨示法用中以此經是俗衆發起故有持齋斷淫等語齊身口業者祭統云齊之爲言齊也齊不齊以致齊者也是故君子非有大事也非有恭敬也則不齊不齊則於物無防也嗜欲無止也及其將齊也防其邪物訖其嗜欲耳不聽樂今釋氏以不過中食爲齊亦取其防邪訖欲齊不齊之義也毗羅三昧經云早起諸天食日中三世佛食日西畜生食日暮鬼神食佛制斷六趣因令同三世佛故今約理解故云齊者祇是中道後不

得食者者即佛制中後不得食也今表初住初地圓證中道心外無法如中後不得食也中前得噉者佛制中前非正食皆得噉之正食者四分律云有五種蒲闍尼此云正食謂麩飯乾飯魚肉也五種法闍尼此云不正食謂枝葉花果細末磨食今云中前得噉即不正食也此得下先表圓位前方便者即指住前內凡位也住前既有相似證義此即中前得噉亦是下次表別位地前離邊觀中即是法界外有法也經云不飲酒者如五分律云跋陀越邑有毒龍雨雹損苗居士請婆陀竭陀降之遂以酒飲吐臥在道佛言

昔伏毒龍今不能降蝦蟇因說漸斷酒戒以酒令人昏亂故今持咒者不得飲約理則酒是無明也涅槃云譬如醉人見日月轉不啖肉者若約事釋如楞伽云有無量因緣不應食肉乃至云令修行者慈心不生及令咒術不成就等是無緣大慈也者此約理釋也

請觀音經疏闡義鈔卷第三

音釋

唎盧

切齒沼切

聾也

果羸

羸即

蟬翁

翁於結切

噪

道

切麩

乾糧也

聖

請觀音經疏闡義鈔卷第三

三

法四

名

浙江嘉興府楞嚴寺

計字一萬二千六百六十

該銀七兩二錢九分

康熙三年 月

般若堂識

與

請觀音經疏闡義鈔卷第四

宋 錢 唐 沙 門 釋 智 圓 述

○涅槃云不住法相及眾生相名無緣慈不住二邊
卽不啻義眾生緣法緣者涅槃云慈之所緣一切衆
生如緣父母妻子親屬名生緣不見父母等見一切
法皆從緣生名法緣是則生緣雖不啻空而啻有法
緣雖不啻有而啻空故云皆有分齊無緣無分齊者
不著二邊故灰能去垢灰如五觀垢如貪等貪等除
時名澡浴清淨說文云澡洗手也浴洗身也五辛苦
辣者慈闕三藏云蔥蒜葶薤興渠五也興渠者應法

經

請觀音經疏闡義鈔卷第四

五

法五

師云梵音訛也應云興宜慈閔云根形如蘿蔔出土
辛臭慈閔冬到彼土不見其苗此五物辛而復葷故
經云五辛能葷有辛而不葷者如薑芥之屬則非所
制蒼頡篇云葷辛菜也凡物辛臭者皆曰葷葷決定經
云若人食酒肉五辛入伽藍隋猪胎中後得人身常
患腋氣故今誦咒之人不得食也今約理解乃以辣
味逼迫於舌如五陰之苦也葷氣經宿猶存如五陰
中所起惑業能至未來故云有集諦也汗穢等者指
上所表是約見愛汗穢陰也九種五陰如前記經女
人汗穢者大論云姪欲雖不惱害衆生以心心繫縛

故既求解脫故須制之經長與苦別者似位別分段
苦真位別變易苦此別圓也亦應約十種行人通證
於前者觀音說兩咒既畢故通印證之釋迦因是自
說第三咒也經來燒此女人者卽鬼動其姪也阿含
云姪亦有鬼鬼入心則使姪佚無度或鬼使瞋使邪
燒乃了切說文云擾戲也郭璞云燒弄也經入善境
界者約十人中餘九皆名善境界也乃至唯佛名善
經惡鬼消伏者觀音有威有恩若非懷恩則是畏威
所以消滅調伏也經三障永盡者二種三障也一分
段三障見思爲煩惱障惑業爲業障界内生爲報障

二變易三障又二一方便三障塵沙爲煩惱障無漏業爲業障變易生死爲報障二實報三障無明惑爲煩惱障非漏非無漏業爲業障彼土變易爲報障此咒能令至於究竟寂光故云三障永盡也三界獄火者三界繫閉行人猶如牢獄無常如火衆苦者分段三界有五八之苦變易三界有塵沙無明之苦四百四病者一大不調百一病起四大合四百四病也界外應以障四德爲病入陣鬪戰者若約理者與五陰魔煩惱魔死魔共戰也經如鷹隼飛者易曰王用射是亦隼于高墉之上孔穎達云隼者貪殘之鳥鷓鴣

之屬今明觀音垂應如彼鳥飛言其速疾也經囹圄者音鈴語廣雅云夏曰臺殷曰羨音酉里紂拘文王是也周曰囹圄皆獄之別名周禮云三王始有獄釋名云囹圄也囹禦也謂領錄囚徒禁禦之也經及諸刑罰者卽五刑五罰也王制曰刑者侗也侗成也一成而不可改也說文云罪之大者曰刑罪之小者曰罰廣雅云罰折伏也尚書甫刑云五刑不簡正于五罰孔安國注云不簡核謂不應五刑當正五罰五刑謂刻其額而涅之曰墨刑截鼻曰劓刑刖足曰剕刑男去勢婦人幽閉曰宮刑死刑曰大辟於今卽笞杖徒

流死爲五刑也五罰者出金贖罪也書云墨辟疑赦其罰百鍰等於今則笞杖徒各有五等流有三等死刑二等贖銅各有斤數經一日等者明受苦惱之時分也第三咒

多經咆 安陀罽 般茶罽 枳由罽 檀陀罽

羶陀罽 禮式禪切 底邪婆陀 耶賒婆陀 頗羅膩祇

毘質雌 難多罽 婆伽罽 阿盧 之引 薄鳩罽

模鳩隸 兜毘隸 娑訶 共五十三字

歎功用文爲三者前一應能拔苦後二是機能修行又前一果上化他後二是因中自行又六道是

所觀之境六妙是能觀之觀六根是所破之惑故此三段經文不出機應自他及機應各論境觀惑三也稱三寶名是六字章句者謂佛陀達摩僧伽一寶二字也三寶爲三字者卽單云佛法僧也若以此六字者卽指前二家處處皆有者前二番咒皆稱三寶應皆名六字章句也起盡之文者起卽標章盡謂結句六妙者此六次第相通能至真妙涅槃故云六妙門也於義爲便者二十五有及以六道但總別之殊大經旣以二十五三昧破二十五有則與今經六字章句對破六道其義相符故云爲便也所以明此三種

經五
青見新經疏卷之三

三

法五

章句者謂三種雖殊不離破有也前一是化他破有後二是自行破有於自行中前一是破有觀後一是有中惑卽六道中各具六根六根皆起三毒也是知三種六字不出大經破有之義也六出者三處各出標章結句也說偈竟者偈應作咒字之誤也後結句云等者卽經云告阿難言是六字章句乃至若有聞者獲大善利六道是六字門者文刺門字無量種者如人道貴賤愚智妍蚩一一不同人道既然餘皆倣此卽是章段句逗義也又照六道實相者謂照六道三障卽三德也此約自行釋遮持義破三障卽遮達

三德卽持故云得陀羅尼等也有我不耶者彼經迦葉問也答云卽佛答也我卽佛性者卽直我也窮此理性者研窮三諦生佛無差菩薩分顯諸佛究竟而能理事互融普門示現故云而得自在故能下約化他釋遮持也以自證故乃能化他亦由自他體性互徧天道苦少者謂非全無苦但少於諸趣爾如欲天有五衰之苦四禪有不得速入禪苦四空有四心之苦八難謂三惡道爲三四北洲五長壽天六佛前佛後七世智辯聰八聾盲瘖啞一切之言等者旣云一切何所不攝尚離三種生死之苦況天趣耶經果旒

說文云木上曰果地上曰蔀應劭云木實曰果草實曰蔀張晏云有核曰果無核曰蔀經亡失下示禍對相經接還本土者失妻子喪財產由亡國故今得接還則餘事自得經鳩槃荼此云甕或云冬瓜其陰似甕等故卽厭魅鬼也經巍巍者高大之稱論語云巍巍乎舜禹之有天下也經阿修羅者阿之言無修羅云天彼非天故又脩羅云端正彼無端正故從今世等者據經分齊從阿難當知已去今的指得失之文故云從今世等失謂失惡是遮義得謂得善是持義如無生忍者大品云無生法卽是佛此與陀羅尼義

同也然亦通因似初境界者似六根淨位旋假入空耳未敢定判故云似也經吉祥句卽陀羅尼近世經本於手出香色乳下剩有飢渴逼切者一句古本皆無智者於諸文引用亦無此句經善集慧卽一切種智也經如救頭然者金光明云譬如男女如火燒頭如火燒衣救令速滅火若未滅不得暫安懺悔亦爾此則然字是燒然也又大論明野干救頭之喻名救頭然則然字是語辭也經寒林者卽尸陀林僧祇律云此林多死屍人人如寒可畏也修頭陀行者多居此林以易觀無常故斯那卽其人乎經無央數者梵

絲

請觀音經疏卷四

五

法

云阿僧祇此云無央數楚辭云時猶未央王逸曰央
盡也觀心下廣釋心脈於中先約肉團心爲因緣之
境次觀慮知心以成三觀赤肉之心卽肉團心也正
法念經中如蓮華晝開夜合卽此心藏也俗書謂之
方寸以此心藏唯方一寸故然爲慮知之所託附故
肉團有病則慮知顛倒也一身之主者提謂經云心
爲大王上義下仁故居百重之內故一身六分悉由
於心也通明觀者謂從初修習通觀息色心三徹見
無礙故名通明又善修此禪能發六通三明因中說
果故名通明此禪無別位次還約根本四禪四空而

修耳今經觀心心脈卽此禪也委明修證如禪門第
八卷若空下此約慮知之心以成空觀於中先立境
次心無下明觀一切世間卽十界各三種世間也無
不從心造者十界是所造心爲能造全所是能故觀
能造卽具諸法種種五陰者亦約十界也此皆華嚴
文心無下正明空觀十界依正旣並由心故觀心空
則諸法空如伐樹得根則枝條自死也言心無心不
有心空皆一義耳乃至無量諸脈者卽十界各各心
脈不同也心脈下覽前空假同歸心性三一圓融故
皆不定不空不假者一念叵得故不假百界宛然故

不空是故空假不離心性諸脈亦不空不假者諸脈皆由心造故諸脈皆卽是心故所以心中故諸脈亦中卽是圓觀心脈者總結前文俱成圓觀行人下云云者以事解歷受苦報及修人天善法者以空觀歷二乘以假觀歷三教菩薩二觀融卽本在圓人深不遺淺義可通攝若有能觀等者卽釋觀心心脈句也能觀卽觀字所觀卽心心脈也旣云一處一卽空也世卽三種音是機緣故屬假也不爲二邊所縛故名解脫是中觀義而又云下此釋伏難也應難云若此經文對三觀者何故結云成阿羅漢耶故今釋云

此約十人前二得道成小乘羅漢乃至成大乘圓頓之羅漢如法華云我等今者真阿羅漢普於其中應受供養則圓人亦名羅漢明矣故云無咎廣明經文應分爲二初從云何下明方便二從安庠去明修證禪法卽次第禪門也云云者謂具五緣訶五欲棄五蓋調五事行五法故有二十五種也故禪門云方便者善巧修學之異名行者於初緣中善巧修習故名方便事理兩解者如止觀約觀心釋方便卽理解禪門中但有事解調五事者謂調食令不飢不飽調眠令不節不恣調身令不寬不急調息令不澀不滑調

心令不沈不浮然此五事食眠則定外各調後三則定內合調今經於五事中但示合調三方便者從要而說行者必須備二十五法具如禪門始於三事等者正明今經從要之意大集經云歌羅邏時卽有三事一命二煖三識出入息者名爲壽命不臭不爛名之爲煖卽是業持火大故地水等色不臭爛也此中心意名之爲識卽是剎那覺知心也三法和合從生至長無增無減愚夫不了於中妄計我人衆生作諸業行心生染著顛倒因緣往來三界名迷若尋其原本不出此之三法名解修此六字者卽是欲修六妙

門故須用此爲前方便也端身者卽跏趺坐也是約戒者戒防身口故約端身定制亂心故約正心慧能念念分別故約相續陽上陰下者如天地也此是世俗所用右陽下正明佛法表對之意右陽左陰如前記欲將等者陰表定陽表散散卽定障也故以陰上陽下世俗既有威儀者卽左手壓右手爲世俗威儀也此卽下示所表麤獷卽七支愆過也自權而顯實者自從也先安右手居下如先施權後以左手置上如後顯實此戒等者於十人中唯約人明慧復須甄別分段中七人是權一人是實變易中一權一實慧

既不等戒定自殊從一下釋修證也分三初正示經
文此一段經六門義足委論行相具在不定止觀及
次第禪門是數門者謂攝心在數不令馳散名修數
門成就息念者謂覺心任運從一至十不加功力爾
時應捨前數法修於隨門一心依隨息之出入想心
緣息知息出入心住息緣故經云無分散意等也不
澀不滑等者謂修止時不念數隨凝靜其心故云不
澀不滑等也經如嬰兒等卽喻修止不澀滑之相也
嬰兒者蒼頡篇男曰兒女曰嬰今言嬰者通男女也
釋各人之初生曰嬰兒者曾前曰嬰接之嬰前而乳

養之也下去是三門者經文從於心端至去於鼻端
是觀門還入心根是還門令心明淨是淨門赤肉下
別釋觀門然經中談觀門義卽通明禪也準禪門所
說有修有證此禪旣無別次位還約四禪而辯修證
今此經文卽是初禪覺支證相也禪門明證相有三
謂初證中證後證今經所明如琉璃不青黃等則似
中後三證欲委知者請尋彼文初心行人欲修習者
當依六門次第先修數門卽如經云安庠徐數從一
至十也數成修隨隨成修止止成方修觀也若約所
宜隨修一門則無前後四大脈者對小得名十脈百

脈名小脈趣四下大師口決云心如拘物頭華四片相合一片各有十紀脈共交絡故心端有四十脈也口決正示初心故止云四十不云四百四十也經云取一中脈者口決云直往趣臍號曰優陀那風優陀那者中也故號此脈爲中脈也又取等者卽是中脈直下趣臍還從臍出至於頭十脈故經云從大脈出至於舌下也口決云其息出從臍出入至臍滅今明出息至舌端故取上四十脈合四大脈爲十四也應舌至鼻者應宜作從字之誤也卽釋經文從舌脈出乃至至於鼻端還入心根直趣於臍猶如江海流注

也口決云身中脈如百川通海是也肝屬木故氣青肺屬金故白脾屬土故黃腎屬水故黑心屬火故赤是略耳者以經不言不赤故諸氣來會鼻等者諸氣卽五藏脈氣也至鼻時失其青等本色但如琉璃瑩徹非五色也息細八寸者此釋經文正長八寸也八寸是出息之微細不羸大也正卽端正不斜曲也定將散者廣雅云將扶也釋名云將獎也今以八寸之息扶持獎護其散亂也表八正者八數等故經至於鼻端者此息從口而出從鼻而入也經還入心根者以此息還從鼻入至於心藏也此卽還門不定止觀

云修還者既知觀從心生若隨於境此卽不會本源
應當反觀觀心此云還入心根卽當反觀觀心義也
經今心明淨者此卽淨門不定止觀云修淨者知色
淨故不起妄想分別受想行識亦復如是息妄想垢
息分別垢息取我垢是名修淨舉要言之若能心如
本淨是名修淨卽今經令心明淨義也然六門皆有
修證合成十二故瑞應云遊止三四出生十二也十
科意者卽大師於建業瓦官寺爲尚書令毛喜略出
此法以爲十科名不定止觀今題爲六妙門者是十
科者一歷別對諸禪二次第相生三隨便宜四對治

五相攝六通別七旋轉八觀心九圓觀十證相今此
經文所明但是第二一科意耳若此下辨此經觀門
也故言通者以通總而說未揀三乘今三下旣未開
顯須示三乘差別之相故須後別方顯前通經勇猛
寶幢者破煩惱障故曰勇猛貴極名寶超出曰幢經
駛速也若無常等者謂餘經或先觀無常也故有三
種者五門之相經不顯談佛意難量故作三釋五處
止等者不定止觀云止爲妙門者行者因此止心故
卽便次第發五輪禪一地輪卽未到地二水輪卽種
種諸禪定禪根發也三虛空輪卽五方便人覺因緣

無性如虛空四金沙輪卽見思解脫無著正慧如金沙也五金剛輪卽第九無礙道能斷三界結使永盡證盡智無生智入涅槃也通名輪者借譬得名禪門云輪者轉也如世輪若轉離此至彼經文旣云節節繫念繫念卽是止門止門卽出生五輪也故云卽是其義今明念佛一門者然五門禪禪經數論兩出不同今師正用禪經故取念佛一門而不明界方便也以今經自云得念佛定故餘者下四門經論皆同慈心等者卽等取所治也謂念佛治睡障道數息治散亂等而毗曇等者正明彼論五門與今經不同也今

經五門正可與禪經會同以俱有念佛故界方便破我見者彼論云著見行者以界方便愚夫不了宿業煩惱積聚五陰於緣計我當於自身以界方便觀察種種性業相謂地等六界彼地界者爲水所潤而不相離彼水界者爲地界持故不流火界成熟故不淤壞風界動故而增長空界空故食得出入有識界故有所造作由衆緣故故知無我足數息等爲五門者等取不淨因緣慈心則無念佛也乃是因緣等者謂毗曇中界方便破我祇是禪經因緣觀義耳以因緣有三種各破不同故一者三世因緣破斷常三世相

續故不斷二世迭謝故不常二者二世因緣破我謂
現未二世具十二緣於父生愛於母生瞋名爲無明
父遺體時謂是已有名之爲行從識支去至老死支
與三世同三者一念破性如下記文是知此三並是
著諸邪見不出生死故通名愚癡故因緣破癡已具
破我義也毗曇五門明界方便破我乃成煩長於破
障道仍闕念佛是故今依禪經方爲具足乃與今經
其義符合故云是故用念佛等無常等者前三如向
疏釋無我卽不著能觀寂滅卽推求能觀至不可得
若五下經云從頭至足一一節間皆令繫念頭等是

色繫念是定又五輪因止而發故屬定也合用定慧
者停心五處是定五處觀察是慧又數息是定餘四
是慧復次下明開合五門六妙旣是開合之異故知
云修五門禪者卽六字義也又此五六但是能治能
不孤立對所得名所治者何所謂三障故束五六以
成三障出隨止二門者數息已當數門卽三妙門也
息有三種者若準禪門明三種卽數息隨息觀息今
約觀門別有所對故以止門在數息方便中各隨義
便止卽不念數隨凝寂其心也以約數隨而修止故
故今以止門在數息中不淨分別六貪各各修觀慈

心分別九品一一與樂此二約觀照義便故對觀妙門因緣方便是還門者因緣破斷常等見還門卽反觀心源四句檢心至不可得卽破斷常等見故知因緣卽是還門念佛旣通三身今以念法身當淨門也以淨門不起妄想諸垢心無依倚卽是見法身理也又合下以能對所結成三障也歎息是報風等者禪門云等心之中覺觀亂法卽是麤四陰故名爲報障慈心不淨因緣者謂慈心治瞋不淨治貪因緣治癡此三毒卽爲習因煩惱障也念佛治障道卽是業障疏皆闕文覺觀三種者一者明利心中覺觀謂於修

定時三毒之中亦無的緣或緣貪或緣瞋或緣癡而所緣之事分明了了二半明半昏心中覺觀明則覺觀的緣思想不住昏則無記瞪瞖無所覺了三一向沈昏心中覺觀謂雖心昏闇如睡眠中而切切攀緣覺觀不住卽有三治者一明利者教令數息數息之法於沈審心中記數能治明利半昏半明者應教令隨隨息出入則心常依息若但數息卽有扶昏之失若但觀息亦有扶亂之失不明善對治也三昏沈者應教觀息求其根原出無分散入無積聚不見定相心眼卽開破於昏沈恚有三種下文闕注云云三種

卷四

言律正莊嚴經卷四

四

法五

者一非理瞋謂修定時瞋覺歛起無問是理非理他
犯不犯二順理瞋謂外人實來惱觸三諍論瞋謂已
所解爲是謂他所說爲非旣他說不順已情卽心生
惱覺欲有內外者卽此內外以成三種一外貪欲謂
修定時貪欲心生男卽緣女女卽緣男取其色貌等
二內外貪欲謂非但貪外男女復自緣己身形貌摩
頭拭頸念念染著三遍一切處貪欲謂非但愛著內
外正報而復於一切五塵依報起貪也癡有斷常性
者此亦三種一計斷常二計有無三計世性此三並
是著諸邪見不出生死是故通名愚癡斷常者推尋

三世若之滅卽墮斷中若謂不滅卽墮常中有無者
謂我及陰等諸法爲定有耶爲定無耶乃至非有非
無耶世性者謂由有微塵故有實法有實法故便有
四大有四大故而有假名及諸世界業有沈浮惡境
者惡業障道亦有三種一沈昏暗弊障謂於修定時
昏沈暗睡無記瞪瞞無所別知障諸禪定二惡念思
惟障謂雖不沈昏而惡念心生或念欲法十惡四重
五逆毀禁還俗等事三境界逼迫障謂身或卒痛覺
有逼迫之事見諸外境或見無頭手足等或復夢中
見諸惡相治法亦各有三者瞋病旣有三種對治亦

三一治非理瞋者應令修衆生緣慈謂約親中怨各開三共成九品觀之皆令得樂取他樂相能生愛念卽破於衆生中瞋惱怨害之心二治順理瞋者應教修法緣慈謂觀五陰虛假不見衆生豈有是非之事但緣諸受中法樂以與於他慈心愛念不應加惱是非旣泯瞋心自息三治一切法中諍論故瞋者應教修無緣慈行此慈時言語道斷心行處滅於一切法不憶不念若無憶念因何諍訟而生瞋心大慈平等同與本淨之樂治三種貪者九想治內背捨治內外大不淨治一切處治三種癡者三世因緣治斷常二

世治計有無一念治世性治三種業障者念應佛謂心緣三十二相等治沈昏暗塞障念報佛謂心緣力無畏等治惡念思惟障念法佛約心緣法性空寂治境界逼迫障藥病相對成三十種具在禪門第四卷明內方便中委說故云具如禪門皆注云云者指在彼文也不用此等治者不用向所明十五種事治也如幻如化者卽下文十喻入實際卽下文推四大一入於如實之際也此卽今經但用第一義般若若正觀通能治十五種病也摩訶衍云有三昧能治三毒卽是今經所明一空無相正觀第一義悉檀也正觀

能治三種貪者思益經云貪欲之人以淨觀得脫不以不淨正觀能治三瞋者般若說昔爲歌利王割截身體爾時無我相等則瞋恨不生故知實相能治於瞋正觀能治三癡者智慧破於無明其義可見涅槃云明時無暗智慧時則無煩惱正觀能治三覺觀者正觀心中言語道斷心行處滅淨名云何謂息攀緣謂心無所得正觀治三業障者普賢觀云端坐念實相是名第一懺是知正觀如何竭藥卽能遍治衆病也故云以入實際遍治之斯那聞下等者此屬第三明六根六字文義鉤鎖故兩向科之經云時優波斯

那聞是語已身如水火等卽簡聲聞觀無明行等卽簡緣覺或入寂定等卽簡菩薩故云簡三乘人六門也金是慧者釋身真金色也金能決斷慧能斷惑以五分有慧身故云身也三乘下約通三乘也俱有卽空之慧故同入真理利根被接則見中道故第一義不無深淺第三審者分經爲五初斯那問二身子答三聞法悟道四身子白佛五述成功用經卽從座起者禮云請益起請業起斯那備其儀故從座起此則二土之禮玄同也卽有三種者謂順色違色平平色初一念時等者卽是心王了其總相謂識創起但緣

青等總相故云初一念時也以未與貪等相應故名
獨頭輔行云直爾障理名獨頭無明一念轉等者卽
是心所了其別相謂次取境像卽心想也次領納前
境卽是受心次起貪等煩惱造作卽是行心故云一
念轉等輔行云與諸使合名相應無明若順下示相
應相無記卽癡也不令三種心起者雖對三色以數
息故則貪瞋癡心不起毗曇論明三藏有門見空如
成論卽三藏空門於四門中略舉二門此約聲聞乘
也若觀下明一念十二因緣也大集云因眼見色而
生愛心卽是無明爲愛造業名行至心專念名識識

共色行是名色六處生貪是六入因入求愛名觸貪
著心者名受纏綿不捨名愛求是等法名取如是法
生名有次第不斷名生次第斷故名死死因緣衆
苦所逼名惱乃至意緣法塵亦然此約緣覺也不明
菩薩者略耳此六等者據法相應先身後意今經文
先明意後明身故云不次第經諸顛倒想等者亦約
意根也想卽想數也其耳等五根皆有三種相應攝
住例眼可知故疏不說今言下釋身根五根微細者
對身卽身根麤大故意根若領等者釋五根皆寄身
根法塵也意根懸思五塵卽是領納法塵也已虛有

諸觸者非實對色等境但心思色等時則眼等已虛
有色等諸觸也文剩備至二字不然則虛有下闕領
受二字故言下牒經故知經舉五塵皆是心意懸思
乃屬法塵耳與細滑相應卽是心思時虛受諸觸也
故經卽云而此識賊乃至遍緣諸法也傷害真性名
之爲賊攀緣不停故云如猿猴走遍緣諸法卽是懸
思五塵時身已虛受諸觸也故此一段經文但是明
身根耳通別圓意者通了根塵卽空別了假名圓了
中道皆名攝住此則十種行人俱論攝住也前約事
解卽屬苦報人及修世間善法人如實故言無堅者

體地本虛入如實際卽無堅也通教下示觀法也通
通別圓故示通義餘亦可了有堅應云無堅字之誤
也又四下破四見示無堅義謂若依三藏四門所見
俱成堅執豈得無堅隣虛者極細之塵隣於虛空名
隣虛塵毗曇析色不滅隣虛卽有門也見空卽是無
見者成論析色隣虛亦滅卽空門也乃至四句者兩
亦如昆勒論雙非如迦旃延經深著等者謂析地至
隣虛卽地是有有卽實實是堅義若謂地是無兩亦
俱非是事實餘皆妄語此之邪執並是堅義故云深
著不可捨等既離四過故求不可得卽無堅性也然

此地大本非四句無堅名字因情謂堅故四句寄堅
破執水不住四句者謂水爲有有卽是住乃至謂水
是非有非無亦卽是住今不住有四句亦不住無四
句中亦不住不可說中故言水性無住風無礙等者
觀風爲有有是礙乃至謂風雙非皆是礙也故云豈
無四句質礙今觀無四句故故云風性無礙不言火
大者文略也應云火不從自生乃至不從無因生本
無自性賴緣而有故云火性不實此明四大本虛卽
色陰入如實際也餘之四陰經文存略但例色陰而
已故云受想行識等若欲推之應云受無領納性不

可得若謂受是有有是領納乃至謂受是非有非無
亦是領納乃至識是了別亦復如是經云一一性相
者卽性相俱空四句推不可得是性空亦不住無四
句是相空所以經文約五陰示者以一切衆生皆五
陰現前故故以陰爲觀境經云皆悉入於如實之際
者五陰俱空故云皆悉等如實之義應通四教同名
實際而有空中之別經諸結賊者見思煩惱能結縛
賊害於行人也若約三結釋義卽疑身見戒取名三
結也是身出火者卽經云身中出火也但有無漏火
者慧人但修無漏觀斷惑不修觀練等禪故無神通

不能化火焚身也備有事理火者用無漏觀斷惑是
理火修事禪發神通能化火焚身是事火子縛卽煩
惱因果縛卽若依身以能化火故燒果縛經收其舍
利者新云設利羅此云身骨而有全有碎碎者悉如
芥粟今斯那卽碎身也經於上起塔者梵云塔婆新
云宰睹波此云廟或云方墳此義翻也見十方佛是
聲聞者卽經云毛孔見佛也問小乘不說有十方佛
何故云見十方佛是聲聞耶答小乘之中諸部不同
亦有信十方佛者卽小乘人修第四禪邊際定力見
十方佛等破惡成支佛者卽經云觀無明等十二因

緣皆悉不實名破惡也經舉十喻皆喻因緣卽空熱
時炎卽陽燄也野馬行者風動塵故於曠野中猶如
野馬行也乾闥婆城者靜苑法師華嚴音義云乾闥
婆城此云尋香城謂十寶山間有音樂神名乾闥婆
忉利諸天意須音樂此神身有異相卽知天意往彼
娛樂因此事西域名樂人爲乾闥婆彼樂人多幻
作城郭須臾如故因卽謂龍蜃所現城郭爲乾闥婆
城也以如彼樂人所作故如幻者如幻師幻出象馬
等如化者如得神通者種種化現住不退是菩薩者
卽經云或入寂定已去經文也此雖約通而通別圓

經
法五
以有接故經童真卽圓初住念不退也言服者結成
意也者卽向經云若有服者身如琉璃等今示此文
是結成三乘六門之意也疏文從便先示經中三乘
之文後方點出一段經文盡是結成之意經具戒定
等者卽成五分法身也防非止惡名戒息慮靜緣名
定觀達有無名慧累盡清淨不滯有無名解脫於一
切境知見顯了名解脫知見此五作成身之因各分
可軌則各法有體依聚三義名身用此五故名爲法
身正在三藏義通四教經身出水火者卽現十八變
身上出水身下出火等也經發三種清淨三菩提心

者三乘道心也經夢中等者夢卽如夢三昧也三昧
成時能見觀世音卽相似分真位人也如大猛風等
者三昧如猛風惡行如重雲生於佛前卽初住出聖
胎也此約理解釋若事解者卽往淨土佛前蓮華化生
也故經云蓮華化生爲父母三流通分疏文無釋令
私分爲五初讚歎付囑二初長行二偈頌分二初七
言偈付囑三初二行付囑爲護正法文中所囑意
在四王東南則囑其正主西北則囑其臣屬囑主則
臣可知矣囑臣則主可知矣提頭賴吒者此翻持國
謂護持國土安衆生故卽東方天王也等等取所

領二部鬼神卽乾闥婆及毗舍闍此卽舉主收臣也
天子者金光明云雖在人中生爲人王以天護故稱
天子也王肅云王者雖號稱帝而不得稱天帝而曰
天子者乃天之子子之與父尊卑相去遠矣法臣者
有法度之臣故曰法臣佛勅令擁護是經如法臣護
於天子也我勅海龍下四行是付西北二方之臣屬
也西方毗留博又此云雜語或云醜眼主領二部龍
及富單那也龍是臣中之勝者故偏囑之伊羅鉢者
亦云伊羅跋羅伊羅樹名也此名臭氣跋羅此云極
謂此龍往昔由損此極臭樹葉故致頭上生此臭樹

因卽爲名閻婆此云雙羅刹此云可畏卽北方天王
之臣屬也北方毗沙門此云普聞或云多聞主領二
部謂夜叉羅刹又云毒龍等者再囑西方臣囑也龍
有四毒故曰毒龍謂聲視氣觸也有出聲方害人者
乃至觸人方害者毗留勒迦或云毗留勒又此云增
長謂能令自他善根增長故卽南方天王也主領二
部謂弓槃荼及閉黎多此亦舉主收臣也難陀跋難
陀者難陀名歡喜跋名善兄弟常護摩竭提雨澤以
時國無飢年瓶沙王爲一會百姓聞皆歡喜從此得
名慈恩云第一名喜次名賢喜此二兄弟善應人心

風不鳴條雨不破塊初能令人喜後性復賢令喜故以爲名娑伽羅從海受名慈恩云卽鹹海之龍也優波陀亦優鉢羅亦漚鉢羅此云黛色蓮華龍依池得名慈恩云紅蓮華居池爲名帝釋者梵云釋迦提婆因達羅釋迦姓也此翻爲能提婆天也因達羅帝也正云能天帝釋提桓因云天帝釋俱訛倒也此在妙高山頂而住三十三天之帝主諸天卽三十二也孝子者孝者畜也事親之道宜常畜在心以在心故能順顏色正導者若眼自開明則不須導引故云須眼又據眼未開者須假正人導之則免墜重險也此段

經文凡有五譬皆譬持經之人謂一帝釋二父母三財寶四眼五正導但取擁護心專爲義二我勅下明違順損益分二初明違教致損鬼神者尸子云天神曰靈地神曰祇人神曰鬼惡人惡口者者三業不善謂之惡人而偏舉口業者以口能毀謗故起不善是修因白癩是花報墮獄是果報二是故下明順教獲益二初破惡益地獄餓鬼其苦重故故偏舉之經云無八難則兼於餘趣也此則破六道三障之惡也二後生下生善益分二初正明生善分二初自行善二普施下化他善一切卽十界大安樂卽三德涅槃也

約五卽明普施義修十地者卽圓十住地從所依得名又別地卽圓住故二我從下引已爲證分二初證自行二永與下證化他三界卽二種三界也二若有下總明人法功能初二句是人誦持此咒卽法離諸惡去五句三字明破惡生善功能初離諸惡等破惡也蓮華化生等生善也胎經云蓮華化生者非胎卵溼化之化生也非化而言化耳實不知四生中之化生也心淨卽三德分顯無塵垢卽三惑分除二五言偈讚歎二初通歎道齊如日月者破衆生煩惱暗如日月之照晝夜也又日喻寶智月喻權智流出等者

相總而好別相若無好則不圓滿輪王釋梵亦有相以無好故相不微妙從總出別故云流出是則依身有相依相有好相以表德令人敬德以念佛好以嚴身令人愛樂欲親近也須彌山者正云蘇迷盧此云妙高亦云安明出水八萬四千逾繕那四寶所成離二種三惡道也界外卽見修無學二一切下別歎今經二初歎能說教主一切佛卽十方三世以諸佛皆讚觀音大悲故二讚歎下歎所說人法顯諸佛皆說此經也二爾時下說咒護持三初叙意二正說咒此咒歷尋古今多本詞句咸同故不錄入良由行人不

誦致免改易三明功用三舍利下傳授所因二初身子問三初歎四咒功能如此神咒者通指四番咒二世尊下正請所因三使未下未來有益二釋迦下答二初正答所因二初悟道因由二初通示所因謂通於無量佛所聞說此咒也二又念下別示所因別於一佛所聞也文分爲四初值名號二彼佛下聞佛言殺三我卽下依教修行四霍然下行成證理霍然者應法師云倏忽急疾之貌也無生忍卽圓初住首楞嚴者大論十八翻健相大經五首楞者一切事竟嚴名堅固一切畢竟而得堅固名首楞嚴也二若善下

勸持獲益受持讀誦書寫解脫者信力故受念力故持看文爲讀不忘爲誦聖人經書難解故須解釋宣傳爲說受持是意業讀誦解說是口業書寫是身業二佛說下衆聞悟道五百卽月蓋等四舍利下未來獲益二初身子白佛二佛告下如來印可再言如是者深可其言也五說此下衆喜會散

請觀音經疏闡義鈔卷第四

音釋

頡

胡結切 牛例切 荆父沸切 媛胡關切 菴郎果切 在本

藏

暹郎佐切 駛疏吏切 淤依據切 瞪澄應切 瞞母豆切 瞞不明也

宰賄

宰蘇骨切逾繕那梵語也此云限

計字一萬一千零六個
該銀六兩三錢四分三厘
康熙三年八月
日般若堂識



十四